

四庫全書

史部

欽定四庫全書

史部

欽定續通典卷十七

詳校官監察御史_臣曹錫寶

洗馬_臣王坦修覆勘

校對官編修_臣吳典

謄錄舉人_臣沈達

欽定四庫全書

欽定續通典卷十七

選舉

臣等謹按杜佑作選舉典始自周官大司徒賓興之制其自序以為成周俊造之目已不及唐虞之官入三代而降選舉之法日增大約以科目取士以銓除注官非後之制不古若也時勢然也唐代選舉多循隋制中葉以後令格間存兩宋迄明士

人出身較易設科加少流內外官注選亦遞變司
衡之較文司銓之勘籍公私互進毀譽紛岐欲立
法以救弊貴因時為變通夫州縣察舉一也兩漢
則理魏晉則亂吏部集選一也神龍則紊開元則
理昭在前事未可槩非第設官多則舉士之門不
得不稍廣廣且濫焉而其得官益壅滯而愈難孔
子曰一張一弛文武之道也廣薦論之門杜倖冒
之路後之科目銓除猶上世之疇咨詢考士大夫

患不為三代上之人材母以不如三代上之造士
論官為患也考言惟華佑雖不滿薦名徵辟詎盡
宜今賢不拘方典不祧近得失具在因之革之蓋
亦選舉之衡鏡也歟佑歷代制三卷前二卷先舉
後選按時代直叙不主行文第三卷專叙唐制文
遂錯綜馬端臨譏其考秀與銓選不分意蓋指此
今續采唐代宗以後至前明故實若德宗貞元間
佑有蒐輯未盡者並著於篇其行文畧依佑前二

卷而雜議論亦兼采云

第一歷代制上

第二歷代制中

第三歷代制下

考績附

第四雜議論上

第五雜議論中

第六雜議論下

歷代制上

唐

五代

唐代宗廣德元年勅兩館生

崇文弘文

皆以資廩補充其經

業楷體通七者與出身永泰元年始置兩都貢舉

先是廣德

二年侍郎賈至言歲方難歟舉人赴省者兩都試之至是勅禮部侍郎官號皆以知貢舉為名兩地別放及第大歷七年停東都貢舉太和元年復勅權置其國子監舉人試上都如故上嘗御宣政殿親

試諷諫主人茂才異等智謀經武博學專門等四科舉

人帝親慰勉賜御厨珍饌茶酒禮甚優異

時方炎暑帝具朝衣永日

危坐翫太宗貞觀政要及舉人策成悉皆觀覽一百餘道將夕有策未成者命大官給燭令盡其才夜分而罷

登科者凡一十五人德宗貞元五年詔明經舉人所習

爾雅多是草木鳥獸之名無益理道宜令改習道德經

十二年司業
裴肅奏復之

六年禮部侍郎親故移試考功謂之別頭

至十六年罷之嗣是屢復屢罷十八年勅今後每年考

試所取明經不得過一百人進士不得過二十人憲宗

元和元年命宰臣已下監試應制舉人於尚書省以制

舉人皆先朝所徵故不親試三年明經停口義復試墨

義十條

七年侍郎韋貫之奏停
墨義依舊格問口義

五經取通五明經取通

六其嘗坐法及為州縣小吏雖藝文可采勿舉穆宗長

慶元年侍郎錢徽所舉送覆試多不中選徽坐貶

段文昌奏

徽取士以私詔白居易王起覆試而黜者過半

故事

進士唱第訖所試雜文及策送中書門下詳覆後廢建中三年復行長慶三年侍郎王起言向放榜而始詳復今請先詳覆而後放榜議者多以避嫌失職非之

年立三史科及三傳科

從諫議大夫殷侗請也

先是進士試詩賦

及時務策五道明經策三道德宗時中書舍人趙贊權知貢舉乃以箴論表贊代詩賦而皆試策三道文宗太和七年勅貢舉人先帖大小經二十帖次對正義十道次議論各一道不試詩賦策八年貢院奏復試詩賦上

從內出題試之謂侍臣曰吾患文格浮薄昨試差勝乃
詔禮部歲取登第者三十人無人不必充數文宗好學
嗜古鄭覃以經術位宰相深嫉進士浮薄屢請罷之帝
曰敦厚浮薄色色有之進士科取人二百年矣不可遽
廢故事禮部試進士將及第人名先呈宰相然後放榜
是年宰相王涯奏禮部取士反先以榜示中書非至公
之道請罷先呈之例一以委有司九年中書門下奏每
年貢士僅千人據格所取其數絕少望付所司精求行

藝添滿四十人及第仍委禮部於所試諸色貢舉人元
格內減一十五人都守每年放出身黃衣人數庶令才
人速得自効從之開成元年詔勲臣子弟有能應進士
明經及通諸科者有司先加獎引五年中書門下奏貢
舉人並不許於京兆河南兩府取解仰於兩都國子監
就試大中六年仍准於兩府集試武宗會昌五年定公卿百寮子弟
及京畿士人寄客外州府等修明經進士業者並隸名
所在監及官學精加考試所送人數其國子監明經舊

格每年三百五十人今請送二百人進士依舊格三十人其隸名明經請送二百人宗正寺進士送二十人東監同華河中所送進士不得過三十人明經不得過五十人鳳翔山南西道東道荆南鄂岳湖南鄭滑浙西浙東鄜坊宣商涇邠江南江西淮南西川東川陝虢等道所送進士不得過一十五人明經不得過二十人河東陳許汴徐泗易定齊德魏博澤潞幽孟靈夏淄青鄆曹兗海鎮冀麟勝等道所送進士不得過一十人明經不

得過十五人金汝鹽豐福建黔府桂府嶺南安邕容
等道所送進士不得過七人明經不得過十人其諸支
郡所送人數請申觀察使為解都送不得諸州各自申
解所試進士雜文據元格合封送省宣宗大中元年禮
部侍郎魏扶奏封彥卿崔瑒鄭延休三人皆因貴胄不
敢選取所試詩賦並封進奏命翰林學士韋琮等考之
中程奉進止並放及第又諭有司考試只合在公如涉
徇私自有利典今後但依常例取捨不得別有奏聞吏

部嘗試宏辭舉人漏洩題目為御史臺所糾其登科人並落下時諸科取人猶濫中書門下奏禮部貢院見置

九科

開元禮三禮三傳三史學
究進舉明算明法童子

徒添入仕之門曾無實

藝請起大中十年權停三年滿後赴試者令有司先進

名令中書舍人覆問本業精通堪備朝廷顧問即作等

第進名候勅處分如事業荒蕪考官當議朝責其諸道

州府薦送童子須實年十一二仍須精熟一經能自書

寫者

廣德二年停童子歲貢大曆三年再停開成三年
勅諸道不得更以童子闕薦然雖有是命而薦者

仍比
有之

如違條例本道長吏亦議懲罰懿宗咸通四年

進士皮日休請以孟子為學科不報十年以軍興停舉

通考作十一年
今從冊府元龜

於十二年別許三十人及第昭宗天復

元年令新及第進士中有久在名場才沾科級年齒已

高者不拘常例各授一官禮部以王希禹等聞時人謂

之五老榜哀帝天祐四年禮部奏朝廷累年多事在遠

舉人併阻隨計逐年所司放榜皆量其人數臨事增減

今干戈稍戢水陸漸通求試雖不廣於往年而貢籍頗

甚其屈譽擬於去年數外更放三數人報可唐制舉之名多至八十有六凡七十六科其尤貴者進士歲貢常不減八九百人縉紳雖位極人臣不由進士者終不為美其推重謂之白衣公卿又曰一品白衫其艱難謂之三十老明經五十少進士其都會謂之舉場通稱謂之秀才拔刺謂之鄉貢得第謂之前進士互相推敬謂之先輩俱提謂之同年有司謂之座主京兆府考而升者謂之等第州府不試而貢者謂之拔解將試各相保謂

之合保羣居而賦謂之私試造請權要謂之關節激揚
聲價謂之還往既捷列名於慈恩寺塔謂之題名大燕
於曲江亭子謂之曲江會籍而入選謂之春闈不捷而
醉飽謂之打鼯鼯匿名造謗謂之無名子退而肄業謂
之過夏執業以出謂之夏課亦謂之秋卷挾藏入試謂之書
策其大畧如此若賢良方正直言極諫才識兼茂明於
體用諸科亦稱得人中葉以後未嘗廢置然前代皆天
子策覽升黜之權一出於上唐則全以付之有司故牛

僧孺輩以直言忤權倖考官坐累而劉蕡所陳尤忠憤
鯁切宰相而下皆不敢為之明白雖當時閹宦之勢可
畏亦由素無親覽之事故此輩得以刳制衡鑑之人也
至銓法自肅宗至德後天下戰討啟弓填委永泰後稍
稍平定而元載用事非賄謝不與官常袞為相思革其
弊凡奏請一杜絕之惟文辭入第乃得進然無所甄異
賢愚同滯崔佑甫代之欲收時望薦引無虛日作相未
踰年除官八百人前後相矯終不得其適

德宗謂佑甫
曰人或謗卿

所用多涉觀故何也對曰苟生平之未識何以諳其才行而用之上以為然

又河西隴右河

南河北不上計吏員大率減天寶三之一而入流者加一故士人二年居官十年待選而考選遷除之法浸壞德宗興元四年以京師寇盜之後天下蝗旱穀貴選人不能赴調乃命吏部侍郎劉滋知洪州選事以便江嶺之人貞元四年吏部奏艱難以來兩都士類散在遠方三庫勅甲又經失墜人多罔冒吏或詐欺分見官者謂之擘名承已死者謂之接脚所以集選加衆真偽混然

謹具由歷狀樣乞委觀察使諸州府縣於界內應有出身以上合依樣通狀發到所司攢勘八年從宰相陸贄

請以內外員三分之計闕集入歲以為常天下稱便

唐制

歲集以孟冬而選盡季春之月乾元後率三歲一調稽壅滯冒吏緣為奸士或十年不得官員闕亦累年不補

九年中丞韋正伯奏按選格銓狀自書試日書跡不同即駁放殿選憲宗元和二年制江淮大縣每歲據闕委三省御史臺諸司長官節度觀察使各舉堪任縣令不限選數許赴集臺省官及刺史亦令有闕先於縣令中

揀擇如有能否與元舉人同賞罰復置具員簿以序內外庶官三年四月詔重定舉縣令之法委吏部精加考

覈仍令四時注擬其觀察刺史所舉不得授以本州府

縣令

是年三月詔秘書省弘文館左春坊司經局校書郎正字宜委吏部於平留選人中擇行藝注擬綜

覈限考入畿縣簿尉任依常格

七年八月令州府五品以上官替後本

道觀察使量其才行幹能堪獎用者每歲冬季聞薦穆

宗長慶二年詔諸道薦送大將其隨節使歸朝者令神

策六軍使及南衙常參官具由歷功績牒送中書門下

量加獎擢其常參武官准具年月日改轉諸道軍府大將監察以上官三年改轉蓋自憲宗御宇凡朔方吳蜀洎山東兩河累興問罪之師帝自藩邸習聞謂戎臣武卒常宜姑息降詔優假復有工賈胥吏窺昇朝籍者厚持緡貨納於方鎮方鎮嗜利即以大將文符給之偽其職秩年月未幾則求薦聞必曰某以歲久宜遷某以殊勲合獎宰臣奏擬下得王官沅弊有不可詰者文宗即位宰臣次第矯舉太和元年勅諸道諸軍諸使應奏判

官并每年冬薦者除新開幕府據元額署外尚後闕某
職奏某人充如更奏者即云某職某人緣某事停奏某
人替臺省官兩考者不在冬薦限又勅釐革兩畿及諸
道奏請散官州縣等官惟三劍三川破內及諸道比遠
許奏縣令錄事參軍每道不得過三五人其餘並停二
年詔曰内外官曹上自要重下至卑散班行府縣更無
闕員薦請沿替為弊滋深況文武名分授受各殊其諸
使諸道等今後宜依注例除舊有正官外不得兼受正

官三年權停東選

太宗時東人選者集於洛州謂之東選

又詔諸道進奏

官有奏請帶正官者不得兼簡較及憲官如准諸道諸軍諸使例請簡較兼憲官充則不得帶正員官四年中書門下奏河北諸道滄景德棣之類經破傷之後靈夏邠寧廊坊涇原振武豐州全無俸料有出身人及正員官悉不肯去吏部從前多不注擬如假攝有勞許於諸色人中量事奏三數員從之六年從御史臺奏諸道節度觀察防禦經畧等使有子孫授京城及諸州府官勒

歸本任不得奏請勾留七年中書門下奏親人之切無
如縣令又錄事參軍糾察屬縣課責下僚一郡紀綱藉
其提舉吏曹注擬真偽難知豈若考績効於理所聽善
惡於臆謠望令京兆河南尹及天下刺史各於本府本
道常選人中擇堪為縣令司錄錄事參軍人名具課績
才能聞薦其諸州先申牒觀察使都加考覈申吏部集
選

吏部尚書侍郎引詣銓曹試時務狀一道訪以理
人之術及陳歷任課績但取事理明切不假詞華取

理識優長者為等第便於大縣難理處注擬

仍取稅五
萬貫以下

縣注投免占
常選人闕員

如有犯賊以本州長吏處分

百貫已下刺
史量削階秩

百貫已上移
守僻遠小郡

觀察使委中書門下奏聽進止其犯賊官

縱過恩赦不在收叙之限八年正月吏部奏准疏理諸

色入仕人等今諸司流外令吏府史掌固禮生楷書醫

工及諸軍諸使承優官典

總一千九百七十二員
請減六百五十七員

兵部

奏應管左右仗千牛僕寺殿中省進馬左右金吾仗長

共一百六十一員
請減六十七員

文簡武簡三衛每年定數

六十
人禮

部奏明經弘文館生太廟郊社齋郎掌坐等

共五百五
十二人減

一百三十人

並請權減從之初中書門下以諸色科目選人

凡未有出身未有官只合於禮部應舉其有出身有官者方合於吏部赴科目選比年格文差互多有白身及用散試官并稱鄉貢者及注擬之時即妄論資次曾無格例其宏詞拔萃學究一經則有定例然亦不在用散試官限其三禮三傳一史三史明習律令並令所司薦

試及第明習律令同明經一史三禮三傳同進士三史

當年闕送吏部

唐選舉之法州府所升者試之禮部禮部所升試之吏部其法裁然然觀貞元

九年御史中丞韋正伯劾奏七年冬京兆府踰濫解送之人已授官六十六人則未經禮部者徑入吏部知唐中葉以後法度廢紊者多矣至太和九年又奏國家取士遠法前代

進士科得人為盛然於入仕須更練達起來年進士及第後三年任選委吏部依資盡補州府參軍縣簿尉官滿之後來年許選三考後聽諸使府奏用便入協律

郎四衛佐未滿者不在奏限

如任江淮官特與免其綱使

開成二年

二月左衛大將軍張克勤請以叙一子官迴與外甥不

允前請迴授並蒙允許至是准左司員外郎裴夷直斷若無已子許及周親自有息男不得妄移他族遂定

為例時諸道有以試御奏授州縣官者上曰每年選人辛

苦尚無缺員與之試御奏授不可輕許

惟河北道吏部不注許其奏請

由是倖進暫息又詔曰近日諸色入流人多官途隘窄

諸道軍將自有衣糧月俸若更占州縣員闕則文吏無所容身今後諸道節度團練防禦等使不得更奏軍將充巡內上佐等官京有司有專知別當及諸色職掌近日諸司奏請州縣及六品已下充本司職掌援引舊例色目漸多致溢舊額今後各於本司見任官內揀擇差

署不得別更奏官四年停嶺南五管及黔中道選補初
兩道得任土人遣郎官御史為選補使亦有不遣御史
者元和間令五年一集選前一年南曹先牒催文解太
和五年

玉海作
三年

權停至是吏部以請詔曰兩道選補停

罷多時極為利便隔年舉奏撓動遠情議者以人遠地
便不足為慮不知一方之政得其人則一境之人受其
福苟非其人則假攝之官皆授里人至有胥賈用賄求
假本州令錄哀剝恣私宜更停五年七月詔諸道並不

得奏人唯河北諸道河東澤潞山劍三川京北京西管

內官員稍多假攝之中悉有勞效每年許奏兩三人

仍須

元額闕不得替見任人時額南節度使盧鈞奏海嶠擇吏與江淮不同若非諳熟土風即難搜求人瘼且嶺中往弊南選今弊北資臣嘗管二十二州惟韶廣官僚每年吏部選授道路遐遠瘴癘交侵更以倭入單微號為比遠非下司貧弱即遠處無能之流比及到官皆有積債鮮誠廉恥臣任四年備知情狀其潮州官吏伏望特循往例不令吏部注擬且委本道求才若攝官廉慎有聞依前許觀察使奏正勅旨依之至武宗時

以州縣攝官常懷苟且委本州刺史於當州諸縣分配公事勾當如官員數少力實不逮即於前資官選擇差

攝不得取散試官充又令進士至合選年許諸道依資
奏授試官充職如奏授州縣官即不在兼職之限又縣
令闕人許觀察使於前資攝官內薦論宣宗大中六年
令縣令司錄錄事參軍今任四上考減兩選餘官得四
上考縣令司錄參軍得三上考並減一選懿宗咸通十
二年依中書門下奏河東潞府邠寧涇原靈武鹽夏振
武天德鄜坊滄德易定三川等道觀察防禦等使及嶺
南五管每道每年除令錄外許量奏簿尉及中下州判

司縣丞共三人

偏州不在秦州縣官限

諸道節度及都團練防禦

使下將校奏轉試官及憲御等令諸節度使每年量許

五人都團練防禦量許三人其御史中丞已下須有戰

伐功勞任其事績申奏簡勘處分以外不得更有奏請

僖宗廣明元年勅選人粟錯長名駁放者除身名踰濫

及欠選欠考外以比遠殘闕收注

文宗開成二年帝以粟錯長名駁放選人

經冬窮悴哀訴可矜勅吏部簡勘如非大段瑕病即與重收注擬不得用平留闕如員闕不相當一唱不伏官者便任冬集其未經中書門下陳狀者勅下後不得續收今年以後亦不為例

哀帝天佑二年

詔曰吏曹注擬申到中書過驗酌量三銓曠務今後州府令錄委吏部注擬中書門下不除授時選人多有重疊磨勘之際各有爭論銓司言具狀須與注擬到任替闕參差請准舊條殿選如是格式申送員闕不得更妄指射旋以梁王朱全忠請令三銓處分常調選人並准舊例其四鎮管內官員候本道申闕到省方與注擬五代當干戈搶攘之歲貢舉未嘗廢也惟土宇分割人士流離故每年所取進士其多者僅及唐盛時之半但

三禮三傳學究明經諸科唐時所取甚少而晉漢後明
經諸科中者動以百人計蓋帖書墨義承平之時士鄙
其學國家亦賤其科而不取喪亂以來文字隆廢為士
者往往從事帖誦之末國家亦姑以為士子進取之途
故其所取反數倍於唐盛時也

梁太祖開平元年凡諸道貢舉人秋薦時藩方不加親
試號為拔解者並令止絕又勅禮部貢院每年所放明
經及第不得過二十人先後詔求卓犖不羈沈潛用晦

究古今刑政之源達禮樂質文之奧者奏試所長待以不次然有其制而無其實也禮部所放進士薛鈞以父

延珪為左司侍郎勅令落下其後兵部尚書知貢舉

唐開

元時以禮部侍郎專知貢舉其後或以他官領多用中書舍人及諸司四品清資官惟會昌中命太常卿王起知貢舉時亦檢校僕射至五代時或以兵部尚書或以戶部刑部侍郎為之不復專主禮部蓋自乾化元年以尚書左僕射楊涉知貢舉始也

姚洎言曩時進士不下千人近歲觀光

之士人數不多加以在位臣僚罕有子弟就其寡少復

避嫌疑實恐因循漸為廢墜請令在朝公卿親屬將相

子孫有文行可取者許所在州府薦送以廣毓才之義
從之翰林學士鄭珏連知貢舉鄴人趙都賂之人報翌
日登第都鄉人聶嶼聞不捷詔來人以嚇之珏懼亦與
嶼第時吏部擬官中書除授多行請託但假貨財雖嚴
勅有司官長仍徇私情而靡才實焉

後唐莊宗同光二年中書門下請權停貢選一年不允

三年以新進士符蒙正等不塞輿望勅翰林院覆試

宣徽

使李紹宏之毀也升王徽為第一桑維翰第二符蒙正第三成傑第四

並勅今後禮部所

試委中書門下子細詳覆奏聞又童子科委本州府依諸色舉人例考試結解送省任稱鄉貢童子長吏不得表薦若無本處解送本司不在考試之限

長興元年勅每年所放童

子不得過十人

四年正月五科舉人許維岳等一百人進狀言

伏見新定格文三禮三傳每科祇放兩人方今三傳一科五十餘人三禮三十餘人三史學究一十人若每年祇放兩人及一人逐年又添初舉縱謀脩進皆恐滯留伏見長慶咸通年放舉人元無定式又同光元年春榜

亦一十三人請依此例以勸進脩奉勅依為永例明宗
天成三年趙鳳知貢舉備陳場中利病七月勅今後應
三傳三禮三史開元禮學究等考試本業畢後引試對
策時宜令主司於時務中取要當策題精詳考校但能
周通典切即放及第不及此格者本業雖精亦須黜落
應九經五經明經帖書及格後引試對義主司於大經
泛出問義五通於簾下書於試紙令隔簾逐段解說但
不失疏註義理通二通三始得入策策並於時務中採

取對策許直言其事初進士帖經通三者准放五年禮部貢院奉勅進士帖經本朝舊制近來此道稍墜負藝者雖多能帖經者甚少恐此一節或滯羣材今年應進士舉所試文策及格帖經或不及通三與放及第來年秋詞賦人所習一大經許令對義今逐處解到進士當司引試雜文帖經後令別於所習一大經內對義目五道考試通二通三准帖經例予其入格長興元年二月勅此後貢院應試三傳三禮宜令准進士九經五經明

經例逐場去留不得候終場方定仍具所通否粗一
於榜內告示其學究不在念書可特示墨義三十道亦

准上指揮

五科中惟學究文書最少乃令念其經而通其義故曰學究今祇許墨義卽學皆專於

此科時
論非之

五月停宏詞拔萃明算道舉百篇等科復明法

科時及第新進士李飛賦內犯韻李穀犯韻一處又詩
內錯寫一字中書門下奏恕其誤其餘多放再解就試
師門門生諸稱及落第舉人無故改名者悉予禁止四
年禮部貢院奏貢人至元日列在方物之前以備充庭

之禮

始於唐長壽三年從左拾遺劉承慶之請

近來直至臨鎖院前赴天應

門外朝見今後請令舉人復赴正仗如舊法並從之

或以

人數不少祇取諸科解頭一人就列其餘續至者俟齊日別令朝見

舊例舉人就試日皇

城司差人於院門前聽察舉人挾帶文書放榜日設棘

於門又閉院門以防下第不逞者貢舉考試官侵星便

出及第人赴五鳳樓前謝恩赴國學謝先師和凝知貢

舉徹棘啟門至晚始出請令舉子於朝堂謝恩訖即赴

國學永為定制自唐末喪亂縉紳之家或以告勅鬻於

族姻至有舅叔拜甥姪者選人偽濫郭崇韜奏革其弊
令未合格人及無名駁放者將偽濫人陳論其見任官
及諸道選人身死並須申報本州令錄於告身書身死
月日選人亦不得周歲逗留致作京債有懼罪逃移者
所司申奏勿齒時澄汰甚嚴放棄田間塗毀告身者十

七人

左拾遺李慎儀吏部員外王松上言崇韜行矯枉
過直之道成欲益反損之文選人一事開達並涉

踰濫文書一紙有誤數任皆不勘詳自天下亂離將五
十載無人不過兵革無處不遭焚燒文書保全固應極
少至二年以來選人不收赴集諸道皆是攝官恩澤不
行祿秩皆廢且攝官祇自州府多因賄賂朝廷不知姓

名所司不考課績皆無拘束得恣貪殘若不別為條例不惟時病難息益亂國章請委銓曹子細簡量但可去其踰濫不失本規酌中以為定制從之惟諸道猶奏請州縣乃令節度使管三州已上者每年許奏管內官三人三州已下者許奏二人防禦使每年許奏一人天成二年許各多奏一人其刺史無薦奏之例不得指請

天成二年令選人過格十年外不在赴集之限有隱憂

者殿五選

制曰人倫之責孝道為先既有負於尊親定不公於州縣

初馮道等議常

調選人限於格例銓注以至留滯而州縣吏員多以顏情兼攝乃議減選補吏以杜倖門然是時九州既未混同十道半違聲教吏員多益州縣無添至長興四年行

減選之勅

一選者無可減兩選三選者減一選四選五選者減兩選六選七選者減三選八選九選

者減四選十選十一選者減五選十二選者減六選

諸色勸進入及山陵行事官

兼每年黃衣選人數千皆援減選並合除官宰相將至內門則數百為羣喧訴詰難騶吏不能止後追罷此勅廢帝清泰二年三銓注擬選人有自超一資至五資亦有三兩人超六資七資八資者門下省言天成三年已前許超折一資者不過三兩人天成三年後格不許超折而中書以重議改移便成淹滯今年請據所注押定

從之三年詔以內外臣僚迭均勞逸其兩使判官畿赤
縣長取郎中員外補闕拾遺三丞五博士列官僚選擢
晉高祖天福三年翰林學士承旨兵部侍郎權知貢舉
崔沔奏今年就舉比常歲倍多科目之中克豪甚衆每
駁榜出時有喧張互相朋扇請令舉人落第後或不甘
心令自投狀披陳却請所試與疏義對證兼令其日一
甲共較儻實負抑屈所司難追憲章如妄有陳論痛加
懲斷其明年停舉又明年罷明經童子宏詞拔萃明算

道舉百篇等科

先是廢及第人與主司選勝宴及中書舍人靴鞋投見舉人兵部禮部引入過

堂日幕次酒食會客悉皆罷之

惟明法一科勅令五選集合格注官優

與處分出帝開運元年復明經童子二科其考試進士

仍以三條燭為限有懷藏書冊者不令就試

長興二年改畫試時

又有容縱懷藏者乃從知貢舉實貞固所請

高祖初行軍副使等例從替罷

者許就家居一年赴闕後即據資比擬以免候闕委困

又令正官滿日長吏預前奏聞不得朝攝暮替又令參

選考驗時所司簡點文書如有粟錯詳酌事理非藏奸

隱倖者免其駁放然是時選格甚繁每月送闕不過五員七員開運中吏部侍郎王易簡請南曹詳定解樣兼備錄長定格取解條例各下諸州如禮部貢院版樣立州縣門每選人取解時各准條件遵給行從之

漢隱帝時刑部侍郎邊歸儼言每年貢舉人動應五舉六舉多至二千三干事業不精入文何取請勅三京鄴都就道州府長官合發諸色貢舉人文解者精加考校不得濫有舉送其選法多依後唐及晉事例令州縣官

幕府官曾受命契丹者追文書毀廢者取唐晉出身文
書本選外仍殿兩選降三資注擬凡唐晉諸科及第人
於契丹年號內出給冬集者許追毀換給仍據新給年
月日理選又從右拾遺高守瓊言勅年未三十者不得
任縣令七十者並宜注優散官

周太祖廣順三年禮部侍郎趙上交請增改貢院諸科
規條時翰林學士承旨刑部侍郎權知貢舉徐合符又
參酌新舊陳奏條制

九經元格帖經一百二十帖對墨
義近義口義共六十道策五道趙

上交請罷帖書泛義口義對墨義一百五十道今去泛
義口義都對墨義六十道其帖書對策依元格五經元
格帖書八十帖對墨義五十道今請對墨義十五道明
法元格帖律令一十帖對律令墨義二十道策試十條
去年罷帖對義六十道今請依元格學究元格念書對
墨義各二十道策五道去年罷念書都對墨義五十道
今請依去年起請三禮對墨義九十九道去年添四十道
今請依元格三傳對墨義一百一十道去年對四十道
今請依元格開元禮三史元格各對墨義三百道策五
道去年加對五十道請依元格進士試雜文詩賦帖經
二十帖對墨義五十道去年代帖經對義別試雜文二
皆今請依別試雜文其帖書對義依元格童子念書二
十四道請添念五十
道及三十通者放

有勅宜依仍於引試之時精加考

校逐場去留無藝者雖應舉年深不得饒借場數有藝

者雖遭黜落並許陳訴祇不得於街市省門故為喧競
及投無名文字訛毀主司違者配流邊遠同保人永不
得赴舉又今後舉人須取本貫文解遠者祇許兩京給
解世宗顯德二年禮部侍郎劉溫叟於進士十六人勅
令看詳黜落十二人五年右諫議大夫劉濤於東京試
士後率新進士劉坦已下十五人赴行在以所試詩賦
進呈上以其詞多紕繆命翰林學士覆試退落七人濤
坐責官翰林學士尚書禮部侍郎竇儀奏比來取解者

詩張薦託舉送者啟倖徇情致令就試不下三千登科
罕踰一百且明經童子二科尤宜勅罷其進士請今後
省卷限納五卷以上於中須有詩賦論各一卷餘外雜
文歌篇並許同納祇不得有神道碑誌文之類其帖經
對義並須實考通三以上為合格將來却復畫試其不
及第人以文藝優劣定為五等文字乖舛詞理紕繆甚
者為第五等殿五舉次者為第四等殿三舉以次稍優
者為第三第二第一等並許次年赴舉三禮解試省試

第一場禮記第二場周禮第三場儀禮三傳第一場左氏第二場公羊第三場穀梁並終而復始學究周易尚書併為一科每經對墨義三十道仍問經考試毛詩依舊為一科對墨義六十道及第後並為上選集諸科舉人第一場十否者殿五舉第二場三場十否者殿三舉其三場內有九否者並殿一舉其進士及諸科所殿舉數並於試卷朱書封送中書門下考試及第進士先具姓名雜文申送中書覆奏訖下當司與諸科一齊放榜

四年詔天下諸色人中有賢良方正能直言極諫經學優深可為師法詳開吏治達於教化者不限前資見任

職官黃衣草澤並許應詔其逐處州府依每年貢舉人

式例差官試解尚書吏部

試策論三道共三千字已上取文理俱優人物與秀者方

得解

取來年十月集上都其登朝官亦許上表自舉自

晉漢以來設官分治釐革失中廣順初頗加更定前資


朝官罷令赴闕

漢隱帝時楊邠以前資官在外慮有游說祇令兩京居止

州郡不得

奏薦無前官及無出身人親沒未葬者不得輒求仕進

而百司奏補官吏不擇事言筆札至有不能舉其條目者顯德二年勅曰諸司寺監收補職員須無訛濫今後勅諸司關送吏部驗考其中者更具引驗可否連所試書跡並本州府不係色後迴文及正身引送中書後吏部具名聞奏候勅下勅本司補收



欽定續通典卷十七

欽定四庫全書

史部

欽定續通典卷十八

詳校官監察御史_臣曹錫寶

洗馬_臣王坦修覆勘

校對官編修_臣吳典

謄錄舉人_臣汪鳴

欽定四庫全書

欽定續通典卷十八

選舉

歷代制中

宋

遼

金

元

宋禮部貢舉設進士九經五經開元禮三史三禮三傳
學究明經明法等科皆秋解冬集春試合格及第者列
名放榜于尚書省凡進士試詩賦論各一首策五道帖
論語十帖對春秋或禮記墨義十條九經帖書一百二

十帖對墨義六十條五經帖書八十帖對墨義五十條
三禮對墨義九十條三傳一百一十條開元禮三史各
三百條學究毛詩對墨義五十條論語十條爾雅孝經
共十條周易尚書各二十五條明法對律令四十條兼
經並同毛詩之制各間經引試通六為合格仍抽卷問
律本科則否皆本貫發解若鄉貫阻越得于開封府投牒奏
候朝旨諸州本判官試進士錄事參軍試諸科或不曉
經藝即以次官充而判官監之監官試官對考通否仍

朱書通否署名其下逐場定去留具元請解及已落見
解人數並進士文卷諸科義卷帖由隨解文送貢院或
應解而不解不應解而解者

其有殘廢篤疾
並不得與解

停所任受

賂者以枉法論長官聽朝旨凡應舉家狀并試卷之首
署年及舉數場第鄉貫不增損移易以仲冬收納月終

而畢將臨試期知舉官先引問聯保

十人或五人同
保不許有大逆

人總麻以上親及諸不孝不悌
隱匿工商異類僧道歸俗之徒與狀僉同而定焉凡就
試禁挾書為姦

進士試詞賦惟
切韻玉篇不禁

及口相授受者進士文

理紕繆諸科不

讀作否後倣此

者俱循周顯德間格殿舉初知

舉官將赴貢院臺閣近臣得薦所知進士之負藝者號

曰公薦太祖建隆三年有詔禁止乾德元年詔九經一

舉不第者一依諸科舉人許令再應後併詩書易學究

為一科

明經試帖書墨義者大概如兒童挑誦之狀故自唐以來賤其科不第者不許再應舊制禮部

試貢院進士設香案于階前主司與舉人對拜所坐設位供帳甚盛至試學究則悉撤帳幕氈席之類亦無茶湯渴取碗水致然其吻益防氈席供應人私傳所試經義當有敗者歐陽修詩焚香禮進士撤幕待經生以為禮數重輕其實自有謂也其明年置制舉三科一賢良方正能直言

極諫二經學優深可為師法三詳閑吏理達于教化並

州府解送吏部試策論三道限三千字以上

四年召陶穀實儀等

同試賢良諸科郝益姜涉等文理疏略賜酒遣之

五年詔舉人有父兄食祿者

覆試

上聞陶穀不能訓子而穀子郅擢上第詔參政薛居正覆試皆合格又下是詔

初遠方寒

士與鄉薦欲試禮部假丐不可得則寧寄舉不試開寶

二年乃詔西川山南荆湖等道所貢士並給來往公券

有挾商旅干關節者罪之三年詔州府萬五千戶舉孝

悌德行一人五千戶舉孝悌德業一人籍貢士及十五

舉以上嘗終場者得司馬浦等一百六人並賜本科出

身

此特奏名思例之始

五年知貢舉扈蒙奏進士十一人及諸科

十七人上召對講武殿始下詔制放榜六年御講武殿

覆試進士宋準等御試舉人自茲始

知貢舉李昉奏宋準以下十一人上

熙進士武濟川三傳劉處而濟川為昉鄉人遂有訴昉用情取舍者時又籍終場下第姓

名得三百六十人皆召見擇一百九十五人并準以下

各賜紙札別試詩賦上親閱之放進士二十六五經四

開元禮七

是歲開寶通禮成詔鄉貢開元禮改稱鄉貢通禮並以新書試問

三禮三十

八三傳二十六三史三學究十八明法五皆賜及第殿
試遂為常式八年覆試合格舉人以禮部所定第一人
王式居第四而以王嗣宗為首自是御試與省試別為
升降而省元狀元之名別矣

唐時武禮部所取未當命
中書門下詳覆然未嘗再

試至宋藝祖太宗御殿覆試然不過審其繆濫者黜之
元在前列者未嘗別定升降景德後多別取狀元然省
元亦皆置前列故事南省奏名第一人殿試唱過三名
不及則越眾抗聲自陳雖在下列必得升等吳春鄉飲
陽修皆由是升第一甲獨范景仁避不肯出至第十九
人方及徐出拜命時服其靜退自此遂為故事蓋當時
殿試雖曰別命官糊名考校然賜第之時往往亦參採
譽望乃定倫魁又凡貢士當賜第者考定必召其高第

數人並見參擇材
質可者賜第一

太宗即位天下已定有意修文嘗謂

治道長久之術莫若參用文武之士太平興國二年御

試合格舉人內出詩賦題

以訓練將士為賦主聖臣賢為詩唐時試題不皆有所出

或以意為之舉子得進問題意謂之上請宋既增殿試進士由循禮部故事景祐中始詔御藥院具試題書經史所出模印給賦韻平仄間次得呂蒙正以下一百九

人李參政至張僕射齊賢王參政化基皆在其間自及是連放五榜通取八百一人一時名臣悉自茲出

諸科及第二百人十舉以上進士諸科一百八十餘人

並賜出身賜袍笏賜宴開寶寺上自為詩賜之

太宗博求俊彥

科場得人之盛唐以來所無然太平興國末年孟州進士張兩光試不合格縱酒大罵于街衢言涉指斥上怒斬之同保九輩永不赴舉恩威並行如此

第一第二等進士及九經授將作

監丞大理評事通判諸州餘皆優等注擬五年上覆試

進士並分甲乙第時顏明遠等四人以見任官舉進士

上惜科第不與皆授近藩掌書記

是歲有趙國昌者求應百篇舉上出雜題

二十字曰松風雪月花竹鶴雲烟詩酒春池雨山僧道柳泉令各賦五篇篇八句逮日旰僅成數十首率無可觀上以此科久廢特賜及第以勸來者仍詔有司後應百篇舉約此題為式

八年進士諸科

始試律義十道進士免帖經

明年進士復帖經分三甲第一甲並知縣諸科仍試

律

雍熙二年以三小經附明法科准考官嫺族別試

是先

國子監開封府所貢士與舉送官為嫺戚則兩司更互試之至是始別遣官

上每閱試卷累

日方畢至四年宰相請如唐故事始詔歲命官知舉應舉者不得有吏人自端拱初年有擊鼓訴校試不公者次年知貢舉固請御試至淳化三年知貢舉蘇易簡受詔後徑赴貢院以避請求後遂為例旋停舉五年至真宗咸平元年始詔禮部放榜得進士五十人高麗賓貢一人時密州發解官坐薦送非人特詔停任三年詔西

京諸路所解舉人宜先訪行實或藝文可採其操履有
虧匿名訛上者並加懲斷勒歸鄉縣課役罪解送所由
官吏先是咸平二年令舉人應三舉者是歲免取解四
年淄青齊州及河北經蕃寇處並免取解泛解之令始
此明年陳恕知貢舉所取甚少諸州舉送官被黜責者
甚衆初京師多外方托籍為便進取咸平元年榜自第
一人至十四人惟
第九名貫河南餘皆開封貫其下亦然大抵多係寄籍後禮部貢院奏令諸色舉
人各歸本貫取解不得寄應有鄉里遐遠久住京師者

許本卿命官委保附國子監取解景德四年上嘗問輔臣天下貢舉人數王旦曰萬三千有餘約常例奏名十一而已上曰若此則當黜者不啻萬人矣典領之官必須審擇命晁迥知貢舉滕元晏封印卷首先是雍熙二年殿試糊名至是用之禮部迨明道二年而諸州無不用之矣凡封卷首及點檢詳試別命官始此初陳彭年舉進士以輕俊為宋白所出至是彭年與迥等更定條制關防不復揀擇文行雖杜絕請託然置科甲者多非人望矣時又定親試進士條制凡策士即殿兩廡張帝列几席

標姓名其上先一日以次序揭示闕外試日拜闕下乃入就席試卷內臣收付編排官其卷首鄉貫狀別以字號第之付封彌官校勘用御書院印付考官定等畢復封彌送覆考官再定等編排官閱其同異未同者再考之如復不同即以相附近者為定合鄉貫狀字號第其姓名差次并試卷以聞

學識優長詞理精純為第一才思該通文理周率為第二文理

俱通為第三文理中平為第四文理疎淺為第五

然後臨軒唱第上二等曰及

第次出身次又次俱同出身大中祥符三年四年先後

試東封路汾陰路服勤詞學經明行修科賜進士俱三十一人是二年未嘗貢舉以封禪特恩親試如後來免省到殿也五年令錄諸州發解試題以聞慮廷試

複出也

徽宗時詔禮部籍內外試題過試頒付考官以防複出

八年始置謄錄院

封彌官封卷後付吏錄本監以內侍二人京官校對訖復送封印院始送知舉定去取

仁宗初明

經嘗問策一道對策純繆上以執經者不善為文命勿

黜落又嚮用上第不數年輒貴顯天聖七年復制舉六

科一賢良方正直言極諫二博達墳典明于教化三才識兼茂明于體用四詳明吏理可使從政五識洞韜

略運籌決勝六軍
謀閭遠才任邊寄

應舉者進策論十卷下兩制看詳優

者召赴祕閣試論六合格試制第一許京朝官太常博

士以下應之又置書判拔萃科應舉者納所錄判詞三卷

本銓差官看詳優者召試判十

共二千
字以上

合格即御試

景祐

元年

又置高蹈邱園沉淪草澤茂材異等科並許白衣

投應仍投策論十卷差官看詳委有可稱封送禮部選

擇召試寶元中帝以進士試詩賦策論先後訪李淑淑

列陳唐代因革之制請先策次論次賦及詩次帖經墨

義分試四場通校工拙有司議稍行焉慶厯四年羣僚
請改進士所試四場先後知諫院歐陽修言凡貢舉法
若二千人就試常額不過選五百人是于詩賦策論六

千卷中

每一人
三卷

選五百人而日限又促考官疲心竭慮

因勞致昏雖有公心而所選多濫此舊法之弊今請寬
其日限先試以策而考之二千人可汰去五六百其留
者試以論又可汰二三百其留而試詩賦者于千人而
選五百少而易精矣時論以策論汗漫難知詩賦聲病

易考乃詔一依舊除又知制誥富弼言殿試有三短考官濫取不擇一也一日試詩賦論三篇不能盡人之長二也考校不過十日不暇研精差次三也必慮恩歸有司則宜使禮部次高下以奏而引諸殿廷唱名賜第與殿試無異也遂詔罷殿試議者多言其輕上恩隳故事乃止時上書者言四年一舉士子客京師待試者六七千人一不幸有故不應詔沈滯輒十數年以此毀行冒法干進者不可勝數宜間歲一貢舉中分舊數而薦之

會王洙侍邇英閣講周禮至三年大比大考州里以贊鄉大夫廢興帝曰古之選士如此今率四五年一下詔故士有抑不得進者不若裁其數而屢舉乃詔間歲貢舉進士諸科悉解舊額之半增設明經試法凡明兩經三經五經各問大義十條兩經通八三經通六五經通五為合格兼以論語孝經策時務三條出身與進士等而罷說書舉英宗時令禮部三歲一貢舉天下解額取未行間歲之前四之三為率明經諸科毋得過進士之

數士得休息官亦不煩神宗初王安石請罷詩賦明經
諸科而以其元數增進士額詔兩制兩省三司三館議
韓維議罷詩賦各習一大經問大義十道不必全記註
疏通七為合格蘇頌議先士行而後文藝去封彌謄錄
之法直史館蘇軾言自文章言之則策論為有用詩賦
為無益自政事言之則詩賦策論俱為無用矣然自祖
宗以來莫之廢者以為設法取士不過如是也近世文
章華麗無如楊億使億尚在則忠清鯁亮之士也通經

學古無如孫復石介使復介尚在則迂濶誕謾之士也
矧自唐至今以詩賦為名臣者不可勝數何負于天下
而必欲廢之上得軾議曰吾固疑此今釋然矣他日以
問王安石安石曰不然今人材乏少以少壯時正當講
求天下正理乃閉門學作詩賦及其入官世事皆所不
習此乃科法敗壞人才致不如古于是卒如安石議罷
明經及諸科進士罷詩賦各治易書詩周禮禮記一經
兼論語孟子每試四場初大經次兼經大義凡十道次

論一首次策三道禮部試增二道又立新科明法以待

諸科之不能改試進士者

試以律令刑統大義斷案中格即取六年詔進士諸科及

選人任子並令試斷案律令大義又詔進士第一人以下並試

九年詔唱名盡四甲而

禮部正奏名上十人未與者奏聽裁決

因殿試進士初覆考官陳澤等

考上一甲文卷失當贖金有差故有是命

元豐元年御史黃廉言別試所解

業詩者十人而取至四五書經止取一人願分經立額

均收其長乃詔詩易悉占三分書二分周禮禮記通二

分八年濟博棣三州諸科舉人訴于禮部言諸科舊額

多歸進士又盡解新科明法今試而中無額可解于是常留諸科舊額十分之一以待不能改業者時王安石詩書周禮義學官謂之三經新義哲宗元祐初尚書省言近歲治經者專守一家不識諸儒傳記之說左僕射

司馬光亦極言新義明法之弊乃詔更科場試法

進士第一

場試本經義二語孟義各一第二場賦及律詩各一第三場論一四場子史時務策二經義進士不兼詩賦人許增治一經詩賦人兼一經以詩禮記周禮左氏春秋為大經周易公羊穀梁儀禮為中經願習二大經者聽不得偏占

八年從中書請今後御試習詩賦人用祖宗

兩中經

法試詩賦論策三題專經人且試策自後槩試三題明
年禮部定御試三題條約旋詔進士罷詩賦專習經義
仍除字說之禁

神宗念字學缺廢王安石乃進其說
學者習焉元祐禁勿用至是除之並

罷春秋科凡試取二禮兩經占全額之半而以其半及
他經徽宗崇寧三年罷州郡發解及省試法凡取士悉
由學校升貢其歲試上舍悉差知舉如禮部試時州縣
悉行三舍法其免試入學者多當官子弟而在學則歲
月累試乃得應貢且老者甚病之五年詔大比歲叅用

科舉取士一次蓋科舉未遽廢也大觀四年侍御史毛
注請以解額之歸升貢者一二分不絕科舉遂詔更行
科舉一次自崇寧以後立科造士之大指以安石新義
故尊經書以司馬光通鑑故抑史學以蘇黃酬唱故廢
詩賦其論似正而羣儉借以行其奸政和中猶有以禁
習詩賦請者而達官貴胄以上書獻頌令直赴廷試蓋
多有焉高宗建炎元年駐蹕揚州命諸路憲司選官即
漕司所在州類省試率十四人取一二年定詩賦經義

取士又詔下第進士年四十以上六舉經御試

御試尚有黜落

嘉祐二年始槩賜出身元祐初知貢舉蘇軾孔文仲請特奏名與試者量取一二千人誠有學問即予出官其餘皆補文學長史之類不理選限遂詔定特奏名考取數進士入四等以上諸科入三等以上通在試者計之母得取過全額之半馬端臨謂嘉祐初即免黜落今自建炎距嘉祐七十餘年宣復有曾經御試之人恐是為試入下等不理選限未出官者而設蓋此曹亦曾經御試故令其再試而官之以示恩渥

八舉經省

試五十以上四舉經御試五舉經省試者河北河東陝西人減一舉元符以前到省兩舉者不限年一舉年五十五以上者所司以名聞令直赴廷試是秋帝親策試

第為五等賜及第出身同出身四百五十一人川陝河
北京東正奏名不赴者一百三人皆即家賜第紹興元
年令有司講求舊制每科場年中丞給舍諫議大夫學
士待制三人舉一人不拘已仕未仕先具詞業

策論共五十篇

送兩省侍從參考文理優長為上次優為中常平為下
上中者並召赴闕試試以九月學士兩省官為試官御
史監之試六論

每首五百字以上

于九經十七史七書國語荀

揚管子文中子正文內出題通四以上為合格仍分五

等以試卷繳奏御前拆號入四等以上召赴殿試其日

上臨軒親策

限三千字以上

宰相撰題差初覆考官詳定赴試

人引見賜坐殿廊兩廂差楷書官祇應內侍賜茶策對

策先引出處然後言事第三等為上恩數視廷試策第

一人第四等為中視廷試第二三人皆賜制科出身第

五等為下視廷試第四人賜進士出身不入等與簿尉

差遣

已上並謂白身者

有官人進一官與陞擢三年立博學宏

辭科

唐有詞藻宏麗文章秀異科大觀中有詞學兼茂科宣和五年詔附省試自辛卯至戊申中選者三

十六人至是工部侍郎李擢奏請改立

試題十二于制誥詔表露布檄箴

銘記贊頌序內雜出六題分為三場每場一古一今試人先投所業三卷朝廷降付學士院考其能者召試除歸明流外入貲及嘗犯賊者皆得試每次所取不得過五人推恩比舊制加優分三等上等轉一官選人改秩無出身人賜進士及第並免詔試除館職中等減三年磨勘與堂除無出身人賜進士出身下等減二年磨勘無出身人賜進士出身並許召試館職先是紹興二年

侍御曾統請廢經義專用詞賦上意鄉之呂頤浩不可而止十三年國學初建從司業高閔言頭場試本經語孟義各一次場試詩賦各一末場試子史論時務策各一十五年分經義詩賦兩科于是學者競習詞賦經學寢微上嘗諭沈守約曰恐數年後經學遂廢二十七年詔舉人並兼兩科內大小經義共三道三十一年言者以為老成經術之士強習辭章不合音律請復分科取士仍詔經義合格人有餘許以詩賦不足之數通取不得過三分

初舉人兼經義詩賦策論因號四科然更制後惟紹興十四年二十九年兩行之而止蓋舉人所習已是为二

不可復合矣

熙寧四年始罷詞賦專用經義取士凡十五年

紹聖元年復罷詩賦專用經義凡三十五年至建炎二年又兼用經賦然則自熙寧以來士無不習經義之日矣然元祐初始復賦欲經賦中分取人而蘇軾上疏言自更法以來士工習詩賦者十人而七欲朝廷隨經賦人數多少各自立額取人則知當時士雖不習詩賦者十五年而變法之餘一習即工且多至建炎紹興之間以經義取士者且五六年其間兼用詩賦纔十餘年耳然共試則經拙而賦工分試則經少而賦多流傳既久所至場屋賦率

御史中丞廖剛言國朝三歲一舉每

居其三之二云

以今年大禮明年科場又明年省殿試為準故注授人
先後到部不至攙併今科試明堂同在嗣歲省司財計
難以應辦一不便也近歲初官待闕率四五年若使進
士蔭人同時差注二不便也更展一年則舊制合矣乃詔
紹興十年諸州應發解者改于紹興十二年正月省試
三月殿試自後視此為準又諸州舊以八月選日試士
舉子有就數州取解者乃詔諸道發解並以中秋日
引試

四川則用季春而仲秋類省

孝宗即位欲令文士能射御武臣

知詩書命討論殿最之法淳熙二年御試唱第後二日引按文士詹駿以下一百三十九人射藝翌日又引文士第五甲及特奏名一百五十二人其日進士具襴笏入殿起居易戎服各給箭六弓不限斗力射者莫不振厲自獻命中者以次注官餘亦賜帛四年罷同文館試六年詔諸道試官隔一道選差又詔特奏名三名取一實第四等以前餘並入第五等其末等納敕者舊許再試今止許一試潛藩及五路舊升甲者今但升名後並

不許納教三次帝策士陞黜不盡由有司十四年嘗擢進士第三王容為第一時儒生迭興辭章雅正號乾淳體焉寧宗慶元二年以諒陰不親策試知貢舉葉翥阿韓侂冑意上言士專習語錄之說中庸大學之書以文其非又傳誦葉適進卷陳傅良待遇集每用輒效請令太學州軍學各以月試合格前三名程文上御史臺考察其舊習不改坐學官提學司罪是舉也語涉道學者皆落至四年言者以經義一科全用套類初無本領請

令有司所出經題各于本經摘出兩段文意相類者合

為一題以杜挾冊售偽之計從之

嘉定末秘書郎何澹言經義宜考注疏而

辨異同命有司命題斷章裂句破碎經文乃詔釐革舊習

時舉子姦弊日滋

其弊凡五曰傳

義曰換卷曰易號曰卷子外出曰謄錄減裂

理宗寶慶二年從左諫議大夫

朱端常言命試院申嚴門禁入試日一切不許傳遞士

人投卷時親書簿歷投匱中封彌官躬親封鐫卷匱俟

舉人盡出院然後啟封分類即付謄錄所明旦申逐場

名數于御史臺檢核其撰號法上一字許同下二字各

異以杜訛易謄錄人選書手充不許代名考官容情任意者臺諫風聞彈奏初省試勅差知貢舉一同知二內差臺諫官一參詳官若干內差監察御史一俾會聚考校微示彈察寧宗初韓侂冑用事將鈐制士人遂于三知舉外別差一諫官為同知專董試事不復干預考校參詳官亦不差察官于是約束峻切氣餒薰灼嘉泰間更名監試製造簿履嚴立程限其失愈甚至紹定元年乃復舊制

端平初御史李鳴復等又言臺諫充知舉參詳既留心考校不能檢覈姦弊乞仍舊差臺

諫為監
試從之

二年有言蜀士嗜利多引商貨押船以致留滯

關津廷試展待乃定四月上旬廷試更不移展時場屋
士子日盛卷軸如山有司迫于日限去取不能皆當蓋
士子本名納卷後或別易名字一人納二三卷不禁挾
書又許見燭漸闌諸郎又間日引試中有一日之暇甚
至次日午方出于是一經義可作二三道詩賦可成五六
篇幸皆中選往往以兄弟承之或轉售同族姦詐百端
四年乃命諸郡于投卷初責鄉鄰覈實處偽縱容者罪

之其弊稍息是年詔避親人與漕舉及待補國子生同

試于別院

舊制避親舉人與鑾廳同試自紹熙分場各試其額七人取一朝士之被差為大院考官

者恐妨其親多不願差而寒士于千百取一之中得預鄉舉數千里辛勤赴省省闈差官又當相避遂有隱身匿名不認親以求免者有憤懣憂沮狼狽旅邸者故有是詔尋罷之四川類試復遣官四類試教差始于紹興二十九年然監試考官十員內惟大院別院監司主文各一員從朝命餘聽制司選差後權委成都帥守從近取其至是仍朝命四員餘從制司分選

嘉熙元年以士子數多

于禮部及臨安轉運司兩試院外紹興安吉各置一院

朝命官前詣同日引試分各路士人就試焉

是年已失京西諸州

軍士多徙寓江陵鄂州命京湖制置司于江陵別立貢院取德安府荊門軍歸峽復三州及隨郢均房京西七郡士人別差官混試用十

二郡元額混取以優之

淳祐元年言者以諸路漕試

合國子試兩項科舉及免舉人不下千數大院既患卷

冗小院又患額窄宜復撥漕舉胄舉同避親人並就別

院引試

三年仍令試別院者歸大院

時淮南諸州郡歲有兵禍士子

不得以時赴鄉舉且漕司分差試官路梗不可徑達乃

命各附近秋試

淮東州郡附鎮江府淮西州郡附建康蘄黃光三州安慶府附江州各增

差試官二員別項考校照各元額取放又以場中程文

多有傳寫雷同四年添差檢點官一員仍差監察御史

一員鈐試十二年廣南分東西兩路考試

廣南西路言所部二十五

郡科選于春官者僅一二蓋山林質樸不能與中土同工因援兩淮荆襄例別考

寶祐二年監

察御史陳大方言士風日薄文場多弊乞令初請舉士

人從所司給帖赴省別給一歷如命官印紙之法批書

發解之年及本名年貫保官姓名執赴禮部又批赴省

之年長貳印署赴監試者同將來免解免省到殿亦如

之如無歷則不收試至度宗朝丞相賈似道欲制東南

士心令御史陳伯大請置士籍開具姓名年甲三代妻室令鄉鄰結勘于科舉條例無礙方許納卷自是嚴行天下或稍有瑕疵不敢有功名之望至似道潰師後臺中始首劾伯大焉宋承唐制科目亦以進士為貴南渡後每科進士及第動至四五百人蓋倍于唐有餘矣唐時及第者未即入仕尚待吏部試宋則登第之後即為入仕之期故其冗更數倍于唐制舉皆天子親試無常科惟召試館職及博學宏詞或起之山林或取之朝著

召之州縣多至大用至五經學究特為時所輕其外則

有胄試

始于景德三年陞朝官嫡親許附國學

鑠廳試

見任官應進士舉者天禧二年詔自

今鑠廳應舉人所在長吏先考試藝合格者聽解如至禮部不及格當停見任類試從賈昌朝議有親戚仕本州及或為發解官及侍父祖遠宦距本州二千里宜教轉運司選官類試由是諸路始有別頭試

宗子試

凡祖宗袒免親已命附鑠廳試非袒免以外例許應國子監禮部皆別試廷試策問與進

士同別考累舉不中年及四十以間而錄用之至紹興二十九年孫道夫極論請託之弊乃教御史一員監之

經明行修試

元祐初倣古制創立此科間取禮部試黜之士附真恩科

八行科

以孝友睦

端任卹中和八行全偏為三舍高下不問內外皆不試而補請託徇私其弊尤甚

明法新科

附舊

銓試熙豐間始立紹興間又降敕差試官二員專撰刑法問題號為假案後又就諸路秋試每五人解一名省試七八取一名皆不兼經御藥院又擬思例分為二等第一等本科及第二等本科出身言者以為濫十六年罷童子科十五歲以下能通經作詩賦州升諸朝而天子親試之其命官免舉無常格真宗時

晏殊姜蓋始賜出身自仁宗至大觀末賜出身者僅二十人高宗時或誦經史子集或誦御製詩文或誦兵書習步射孝宗淳熙八年始分三等凡全誦六經孝經語孟及能文如六經義三道語孟義各一道或賦一詩一為上等與推恩誦書外能通一經為中五代時皆以軍等免解二次止誦書者下等免解一次

卒為將故武舉久廢仁宗天聖七年以西邊用兵將帥乏人復置武舉明年親試武舉十二人先閱其騎射而

試之以策為去留弓馬為高下皇祐初復廢英宗治平元年復置神宗熙寧時樞密院修武舉試法不能答策者答兵書墨義王安石言武舉復試墨義則亦學究之流禦侮之用何事記誦乃悉從中書所定凡武舉于祕閣試義策于殿前司試武藝及殿試則試騎射及策于庭俱優為右班殿直武藝次優為三班奉職又次借職未等三班差使減磨勘年策平武藝優者除奉職次優借職又次三班差使減磨勘年武藝末等者三班差使

元豐元年立大小使臣試弓馬藝業出官法第一等步射一石矢十發三中馬射七斗馬上武藝五種孫吳義十通七策五道文理優長律令義十通七中五以上免短使減一任監當三事以上免短使升半年名次兩事升半年一事升一季第二等步射八斗矢二中馬射六斗馬上武藝三種孫吳義通五策三道成文理律令義通五五事免短使升半年三事升半年兩事升一季一事與出身官第三等步射六斗矢一中馬射五斗馬上

武藝兩種孫吳義通三策三道成文理律令義通三計
算錢穀文書五通三中五事升半年三事升一季兩事
與出身官其步射發兩矢馬射發三矢皆著為格先是
樞密請建武學于武成王廟額選生員百人分三舍又
保任者附入外舍偕上舍生發解崇寧間諸州立武學
倣儒學制立考選升貢法徽宗宣和時州縣武學既罷
有願隸京城武學者許補試欽宗靖康元年詔諸路有
習武藝知兵書者州長二以禮遣送闕下毋限數高宗

建炎三年詔武舉人先經兵部驗視弓馬于殿前司仍
權就淮南轉運司別場附試七書義五道兵機策二首
孝宗乾道五年始令武舉廷試依文舉給黃牒榜首賜
武舉及第餘並賜武舉出身初武臣試換文資須從官
三人薦舉紹興中令敦五郎以下聽召保官二人以經
義詩賦求試其後太學諸生久不第者多去從武舉同
鏐廳之制後以林頴秀言武士舍棄弓矢更習程文褒
衣大袖專做舉子夫科以武名不得雄健喜
功之士徒啟其僥倖名爵之心于至其入仕授官有貢
是詔罷鏐廳換試寧宗初旋復之

舉奏蔭攝署流外從軍五等吏部銓惟注擬州縣官舊
幕職皆使府辟召宋則吏曹擬授京諸司六品以下官
皆無選中書特授周朝每藩郡有關或遣朝官權知太
祖始削外權止令文臣權蒞其後但以差遣為資歷皆
非本職京朝官則審官院主之使臣則三班院主之少
卿監以上中書主之武臣刺史副率以上內職樞密院
主之後又分為四選文選曰審官東院曰流內銓武選
曰審官西院曰三班院元豐定制銓注悉歸選部以審

官東院為尚書左選

文臣寄祿官自朝議大夫職事官自大理正以下非中書省教授者

歸之

流內銓為侍郎左選

自初任至州縣幕職歸之

審官西院為尚書

右選

武臣升朝官自皇城使職事官自金吾階衛仗司以下非樞密院宣授者歸之

三班院為

侍郎右選

自借差監當至供奉官軍使歸之

凡非登科及特旨者年三

十五方注官其大制如此建隆四年選朝士分治劇邑

又詔諸州吏民不得詣京師舉留節度觀察等使刺史

知州通判幕職等官開寶四年罷諸道攝官闕員處即

時奏聞委有司除注又令經三朞無曠敗者不在此限

時荆益交廣內附遠吏多闕是以歲常放選而取解季

集之制漸廢

諸州印廢春季選人文解以遠近分限並於正月十五日前到省餘季准此其因選

部闕官特詔免解非時赴集謂之放選

六年復四時選應引對者每季一

時引對之凡選人試判三道二道全通一道稍次文俱

優為上一道全通二道稍次文稍堪為中三道全次文

紕繆為下判上者職事官加一階州縣官超一資判中

依資判下入同類惟黃衣人降一資至太宗太平興國

元年增為四等以三道全次文翰無取為中下依舊判

下格其全不通而文又紕繆為下殿一選六年詔京朝
官除兩省御史臺自少卿監以下奉使從政于外受代
歸者令中書舍人郭贄膳部郎中兼侍御史知雜事滕
中正等考績論材以中書所下闕員擬定引對以遣謂
之差遣院時庶僚引對其數納可采者多有超擢上慮
有幸冒復詔應引對遣命者中書門下考審進止端拱
三年令宰相以下至御史中丞各舉朝官前代自一品以下皆曰常
參官宋曰朝官祕書郎以下未常參者曰京官一人為轉運使真宗咸平初從

祕書郎陳彭年請令兩省御史臺官尚書省六品以上
諸司四品以上官授訖詣閣門投表讓一人自代方得
入謝在外者授訖三日內具表附驛以聞至大中祥符
五年詔翰林學士以下常參官歲各舉外任京朝官三
班使臣幕職州縣官各二人諸司使副承制曾任西北
邊川廣銓轄親民者並同此例諸路轉運使副提點刑
獄官知州通判結罪奏舉部內官屬不限名數仁宗初
吏部奏天下幕職州縣官期滿無代者八百餘員川廣

尤多未代帝曰此豈人情所樂耶其令亟代天聖六年
詔審刑院舉常參官在京刑法司者為詳議官大理寺
詳斷刑部詳覆法直官皆舉幕職州縣曉法令者為之
自請試律者須五考有舉者乃得試律三道疏二道又
斷中小獄案二道通者為中格時舉擢不常國子監闕
講官嘗詔諸路轉運使舉經義通明者欲不次用人嘗
詔近臣舉常參官歷通判無贓罪而才任繁劇者已之親及
執政近屬欲官諸邊要嘗詔節度使至閤門使知州軍
母得舉

鈐轄諸司舉殿最以上材勇使邊任者或令三司使下
至大章閣待制舉奏之邊有警又或詔諸轉運使提點
刑獄升朝官舉所部官才任將帥者三路知州通判縣
令皆詔近臣舉廉幹吏選任之至于文行之士錢穀之
才刑名之學各因時所求而薦焉自天聖後進者頗多
物議患其冗始戒近臣非受詔毋輒舉官英宗治平三
年上語中書曰水潦為災言者云咎在不能進賢何也
歐陽修曰往時入館有三路今塞其二矣

宋以史館昭
文館集賢院

為三館皆寓崇文院其實無別舍但各以庫藏書列于廊廡間耳直館直院謂之館職以它官兼者謂之貼職凡狀元制科一任還即試詩賦各一而入否則用大臣薦而試謂之入館自崇文院廢為祕書監建祕閣于中自監少以至正字列為職事官罷直閣直院之名而書庫仍在獨以直祕閣為貼職之首皆不試而除蓋特以為恩數而已

進士高科一路也大臣薦舉一路也因差遣例除一路也往年進士五人以上皆得試第一人及第有不十年即至輔相者今第一人兩任方得試而第二人以下不復試是高科路塞矣往時大臣薦舉即召試今只令上簿候缺人乃試是薦舉路塞矣惟因差遣例除

者半是年勞老病之人此臣所謂薦舉路狹也上乃命
宰執舉館職各五人熙寧二年罷初入兩府舉官之制
故事二府初入得舉所知者三人時陳升之拜相循例
為侯叔獻程顥皆與堂除又升一任帝以不考材實罷
其制時御史又乞罷堂選曾公亮執不可王安石謂中書
所總已多不能精擇宜歸有司自此輕重失倫無進賢
退不肖之實矣明年以樞輔任重不當親有司之事乃
置審官西院專領閤門祇候以上諸司後磨勘常程差
遣其內外舉官之制皆罷初吏部選格其法各隨所任

職事以入任功狀立格以待擬注至哲宗元祐時司馬

光為相請在位達官人舉所知設十科以舉士一曰行

義純固可為師表

有官無官皆可舉

二曰節操方正可備獻納

舉有官人

三曰智勇過人可備將師

舉文武有官人

四曰公正聰明

可備監司

舉知州以上資序

五曰經術精通可備講讀

有官無官人皆可

可舉六曰學問該博可備顧問

同上

七曰文章典麗可備著

述

同上八曰善聽獄訟盡公得實

舉有官人

九曰善治財賦公

私俱便

同上

十曰練習法令能斷請讞

同上

應職事官自尚

書至給舍諫議寄祿官自開府儀同三司至大中大夫
職自觀文殿大學士至待制每歲各隨所知于十科中
共舉三人歲終不舉及人數不足按劾施行或不如所
舉

謂舉行義純固而
違犯名教之類

其舉主從貢舉非其人律科罪犯

正入已職舉主減三等科罪若受賄徇私自從重法詔
從之又詔大臣奏舉館職並如制召試除授高宗建炎
初選籍散亡乃下諸道州府軍監籍屬吏寓官之爵里
年甲出身歷任功過舉主列罷月日上之時赴調者盡

萃東南選法留滯乃詔京畿京東西河北河東士夫在
部注授雖銓未中而年及者聽注官二年又令京官赴
行在者非政和以後進書頌及直赴殿試之人乃聽參
選在部諸州軍通判簽判及京朝官知縣監當權以二
年為任舊以三年為任四年戒吏部長貳堂中或取部闕並須
執守毋得供報言者以京黼用事有詣堂及闕者判一取字雖已注入亦奪予之甚至部有佳
闕密獻以自効為寒遠紹興元年詔曰亂離以來士夫
患踰二十年乞下此令流徙有徒跣而赴行在者注授膀闕姦弊日滋宜令三

省議除其弊于是議立八事曰注擬藏闕申請徵幸去
失艱難刷闕滅裂闕會淹延審量疑似給付邀求保明
退難令長貳機柅之二年呂頤浩言近世堂除多侵部
注請倣故事外自監司郡守及舊格堂除通判內自察
官省郎以上館職書局編修官外餘闕并寺監丞法寺
官六員等武臣自準備將領正副將以上其部將巡尉
指使以下並歸部注至二十二年復以進士及門蔭子
弟不復參部自千堂除下詔申禁是年從侍郎凌景夏

言令吏部七司凡換給之期限戰功之定處去取之保
任書填之審實奏薦之限隔酬賞之用否凡經申請或
白堂或取旨者每一事已郎官以次擬定而長貳書之
于冊永以為例舊制宗室文資與外官文臣參注窠闕
武資則不得與武臣參注但注添差孝宗時始聽注釐
務闕又詔宗室曾應舉得解者許參選餘並銓試其三
試終場不中人聽不拘年限調官先時選人應改官必
引對便殿每五日引二人神宗令每甲引四人元祐變

法三人為甲月三引見積累至紹聖初待次者二百八十餘人乃令五日而引一甲然改官無定數紹興之季遂至百十三人孝宗患之稍嚴陞改之令淳熙六年引

見改官不及七十員

明年吏部請以七十員定額自是歲改京官者僅百員遂為永制

是年又以歲舉京官數濫

初無常數有其人則舉

王中行時兼給

事中議請六曹寺監歲減舉員三之一諸路監司減四之一禮部國子監長貳減三之二前執政歲減二員諸州無縣者歲止一員歲終不除運副而判官補發者不

理為職司至寧宗慶元元年復詔判官補發副狀理為

職司又詔職司狀不得用二紙

用姚愈奏

嘉定十二年詔侍

臣兩省臺諫各舉文武可用之才二三人又命監司守

臣舉十科政績所知自代露章列薦並籍記審察任滿

則擢其舉數多有政績行誼者理宗紹定元年臣僚上

言銓曹之患員多闕少注擬甚難自乾道以來嘗命選

部職官窠闕各于元出闕年限之上與展半年用闕歷

年寢久入任者多今吏部參注之籍文臣選人武臣小

使臣校尉以下不下二萬七千餘員率三四人共注一

闕固宜壅滯乃命吏部錄參司理司法令丞監當酒官

于元展限上更展半年淳祐四年以臺諫耳目之官例

由親擢不許大臣薦進七年監察御史陳垓建言銓法

十弊一添差數多破法耗財

謂倅貳幕職參議機宜總戎鈐轄監押之類

二

抽差員衆州縣廢職

謂監司帥守幕屬多差見任州縣他官權攝

三攝屬違

法蠹政害民

謂監司帥守徇私差權幕職

四須入不行徼幸撓法

初改

官者必由知縣謂之須入此謂規免作令苟圖五奏辟

京局躡求倅貳遂使不曾歷縣之人冒常郡寄

不應奔競日甚

謂未經任人在法不許奏辟今或以初任或以闕次遠而改辟見次者六

改任巧捷紊亂官常

謂在法已援差遣人不得干求換易今既授是官復謀他職辭卑居

尊棄彼就此

七薦舉不公多歸請託八借補繁多官資泛濫

九壞曠職守役心外求十匿過居官翫視國法

謂曾經罪犯必

俟赦宥今既遭劾初未經赦者經營差遣

八年令未歷郡者不得為郎已為

郎者更迭補外未歷縣者必令須入已作縣者須及任滿其闕次不得差改其後又詔改官班引者先赴都堂或御史臺各試書判不通者且令為丞俟再試中方與

集注若夫文武蔭補之制自期親至餘親奏薦最廣太祖時定任子之法臺省六品諸司五品登朝嘗歷兩任然後得請太宗淳化改元恩文班中書舍人武班大將軍已上並許蔭補

如遇轉品許更蔭一子

至道二年始有聖節奏

薦之例大中祥符元年始有東封禮畢推恩之令熙寧時定限年限員之法宣和中中大夫至帶職朝奉郎入官十五年諸衛大將軍至武翊大夫入官二十年内侍官武功大夫至武翊郎累奏不得二人淳熙九年更務

裁抑立郊蔭補恩正數宰相十人

開府儀同三司以上同

執政八

人侍從六人

觀察使至節度使侍御史同

中散大夫至中大夫

右武大夫

至通侍大夫同

帶職朝奉郎朝儀大夫三人

武翊大夫至武功大夫同

致仕

遺表恩澤文臣見任宰相八年曾任宰執七名見任執

政六名曾任執政五名在內侍從在外待制以上或不

帶職大中大夫以上二名無遺表止得致仕者侍御史

中散中奉至中大夫朝奉郎至朝儀大夫一名武臣見

任使相七名曾任使相六名見任執政太尉六名曾任

執政節度使五名諸衛上將軍至承宣使四名觀察使
三名通侍大夫二名正侍至右武大夫諸衛大將軍武
功至武翊大夫一名大中祥符時門蔭授京官年二十
五十求差使者令于國學聽習經書以二年為限仍令
審官院與判監官考試以聞其初皆試律暨詩已任而
無勞績舉薦及無免試恩皆試判更制以後暨試律義
斷案議後又增試經義中選者皆得隨銓擬注其入優
等者往往特旨賜進士出身

遼太祖起自朔漠干戈倥偬未置科目至後設鄉府省
三試鄉中曰鄉薦府中曰府解省中曰及第程文
分兩科一詩賦一經義其試進士貢院以二寸紙書
及第者姓名給之號為喜帖明日舉案而出樂作
及門擊鼓十二面以法雷震殿試臨期取旨第一
人特增一官授奉直大夫翰林應奉文字第二第三
人以下並授從事郎詞賦為正科法律為雜科聖
宗統和六年詔開貢舉九年放進士及第祇一人十一

年始放二人太平五年幸南京內果園宴求進士得七十二人命賦詩第其工拙以張昱等十四人為祕書郎餘並崇文館校書郎九年皇城進士張八紀等二十三人入朝試以詩賦皆賜及第興宗重熙五年十月幸南京御元和殿以日射三十六熊賦

是秋獵黃花山獲熊三十六因

以命題金時亦嘗以此題試進士

幸燕詩試進士于廷賜馮立趙徽等

四十九人進士第以立為右補闕徽以下皆太子中舍賜緋衣銀魚御試進士自此始又從宰臣張儉請幸禮

部貢院宴賚甚渥將軍庶箴子富魯舉進士主文以國制無遼人試進士之條聞于上上以庶箴擅令子就科目鞭二百尋命富魯為牌郎君賦詩稱旨洊被恩禮而涿州王棠鄉貢禮部廷對皆第一時醫卜屠販奴隸及倍父母或犯者逃亡者不得舉進士道宗咸雍六年設賢良科應舉者先以所業十萬言進十年御永安殿策之是歲放進士二百三十八人以馬希白詩才十吏不能給召試之天祚中禁商賈家應進士舉云太宗會

同初選約尼氏九帳子弟可任官者聖宗初華喇部請
今後詳穩止從本部選授上以諸部官惟在得人命勿
以所部為限統和七年宋進士挈家來歸者十七人命
有司考其中第者補國子官餘授縣主簿尉十二年詔
宋俘中官吏儒生抱器能者諸道軍勇健者具以名聞
授衛德升等六人官其後又以國舅及南北王府乃國
之貴族賤庶不得任本部官興宗重熙十六年詔世選
之官擇各部耆舊材能者任用道宗太康九年定諸令

史譯史遷叙等級凡任子之令文武並得奏蔭各限員數聖宗定制其没于王事錄其子孫

金承遼後先後設詞賦經義策試律科經童諸科又有

女直進士科

專試女直文字初但試策後增試論亦謂之策論進士

又嘗制舉宏詞科

以待非常之士其詞賦經義策論中選者謂之進士律科經童中選者謂之舉人太宗天會改元急欲得漢士以撫輯新附始置科舉至明年二月八月凡再行焉五年令因南北素所習業以取號為南北選各以經義詞賦兩科

取士海陵天德二年併南北選為一明年罷策試科

諸進士舉人由鄉至府由府至省至殿廷凡四試

章宗明昌

初言者以舉人四試而鄉試為虛設乃詔罷免

鄉試以三月二十日府試若策

論進士則以八月二十日試策間三日試詩詞賦進士

則以二十五日試賦及詩間三日試策論經義進士又

間詞賦後三日試所治經義又三日試策次律科次經

童每場皆間三日試會試則策論進士以正月二十日

試策餘以次間如前御試則以三月二十日策論進士

試策第二十三日試詩論二十五日詞賦進士試賦詩論而經義進士亦以是日試經義二十七日乃試策論若

試日雨雪則候晴日御試唱名後試策則稟奏宏詞則

作二日程試

舊試女直進士在試漢進士後大定未更定是制

府試策論進士

凡四處

大定間令于中京上京咸平東平試

後增為七處

明昌初增北京西京益都兼

試女直經童

上京海蘭率賓呼爾哈扶餘東北招討司赴會寧府咸平隆州博索東京益州懿州

赴咸平府中都河北東西路赴大興府西京并西南西北二招討司赴大同府北京臨潢宗州興州全州赴大

定府山東東西大名南京赴東平府山東東路則就益都試詞賦經義進士及律科經

童凡六處

大定間令于大興大定大同開封東平京兆

後增為十處

明昌初增遼陽

平陽益都後又增太原其中都河北赴大興府初經義上京東京咸平等路赴遼陽府餘各試于其境

于易書詩禮春秋專治一經內出題

天德三年罷大定二十八年復詞

賦以經傳子史出題嗣又逐年改一經

以詩書易禮春秋為次注內亦

許出題海陵正隆元年用五經三史正文章宗初用五經

子史皆于題下注其本傳士子程文所用事得自注出

處承安後令考試詞賦官各作程文一道式示舉子後

以考官離筆硯久擬作不工恐起謗議乃罷此制當世

宗大定時會試取詞賦進士不得過五百人章宗令合格則取承安二年至九百二十五人泰和二年始令策論三取一詞賦經義五取一又令武舉終場年四十五以上四舉終場年五十以上者方授恩例

世宗末令五次御簾進士

止以文之高下定其次而不黜落謂之恩榜明昌初令省元直就御試不中者許綴榜末府元被黜者許來舉直赴部仍一日試三題五舉者止賦詩所試文惟犯御名廟諱及不成文理始黜女直進士亦同此例承安二年令四舉該恩泰和三年以經義會元與他科進士不同不得以御試被黜優附榜末然又與四舉者不同遂依府試解元免府試之例會試下第再舉直赴御試至宣宗時終場人年五十以上者即行該恩河北舉人中

選而阻兵者免後舉府試策論進士專選女直人大定初擇良家子

習女直文字教以古書作詩策十三年始令每場試策

一道限五百字以上免鄉府試止赴會試御試二十年

以策詩試三場

策用女直大字詩用小字

依漢進士例三年一舉時

又以試策既久人能預備宜于五經內出題加試以論

二十九年增試論題俟第三舉後通定去留以詩策合

格為中選以論定名次承安二年定限丁習學之制凡

內外官員諸局分承應人武衛軍若明安穆昆女直及

諸色人戶惟一丁者不許應試兩丁一人四丁二人六丁以上止許三人明年令女直進士年四十五以下者府試十日前委佐貳官善射者試射其制以六十步立塚去射者十五步對立兩竿相去二十步去地二丈以繩橫約之弓不限強弱不計中否以張弓巧便發箭迅正者為熟閑射十箭中兩箭出繩下至塚者為中選餘路委提刑司在都委監察體究赴會試御試者大興府佐貳官試驗三舉終場者免之宣宗興定元年制中都

西京等路策論進士權于南京東平博索上京四處府
試至五年賜第者僅二十八人其賢良方正能直言極
諫博學宏材達于從政等科試無常期上意欲行則告
天下聽内外文武六品以下職官無公私過者從内外
五品以上官薦試之若草澤之士德行為鄉里所推者
從州府薦之凡試先投所業策論三十道于學士院視
其優者委官以羣經子史内出題一日試論三道可則
廷試策一道通貫者優等遷擢之宏詞科試詔誥章表

露布檄書皆用四六誠諭頌箴銘序記或依古今體于
每舉賜第後進士及在官六品以下從在外官薦令試
策官出題就考凡四題分二等上等遷兩官次等遷一
官皆明昌初所置也四年以後郡縣所舉德行才能之
士往往賜同進士出身或賜及第焉凡府會試每四人
則一人監檢御試策進士則人各一名泰和元年從省
臣請依大定故事使與試者就沐浴官置衣為之更之
又嘗以竹林寺憫忠寺為場屋其放第唱名天眷初嘗

于析津廣陽門西一僧寺遷都後改從宣陽門律科以
律令出題府試十五題每五人取一大定二十二年會
試每場十五題三場共通三十六條以上為中選二十
九年加語孟小義一道府會試別作一日令經義試官
出題與本科通考經童凡士庶子年十三以下能誦二
大經三小經又誦論語諸子及五千字以上府試十五
題通十三以上會試每場十五題三場共通四十一以
上為中選貴幼而多誦者若年同則多誦大經者為勝

大定未限以三十或四十人能擢進士第者同進士任
用如中府會試視其次數優其等級幾舉不得薦者從
本出身泰和元年定試武舉之制分上中下三等能挽
一石力弓以重七錢竹箭百五十步立貼十箭內府試
中一箭省試中二箭程試中三箭又遠射二百二十步
垛三箭內一箭至者又百五十步內每五十步設高五
寸長八寸卧鹿二能以七斗弓二大鑿頭鐵箭馳射府
試則許射四反省試三反程試二反皆能中二箭者又

百五十步內每三十步左右錯置高三尺木偶人戴五寸方板者四以槍馳刺府試則許馳四反省試二反程試一反左右各刺落一板者又依廕例問律一條又問孫吳書十條能說五者為上等凡程試一有不中者皆黜之若射貼弓八斗遠射二百一十步射鹿弓六斗孫吳書通四為中等射貼弓七斗遠射二百五十步射鹿弓五斗孫吳書通三為下等解律刺板皆欲同前不知書者上為中中為下其中下願再試者聽三年定武舉出

職遷授格上甲第一名遷忠勇校尉第二三名遷忠翊校尉中等遷修武校尉收充親軍不拘有無廕視舊格減一百月出職下等遷敦武校尉亦收充親軍減五十月出職終金之世科目得人為盛諸宮護衛及省臺部譯史令史通事其餘仕進皆得列正班文武選皆統于吏部自從九品至從七品職事官部擬正七品以上呈尚書省以聽制授凡文散官謂之文資官自餘皆武散官謂之右職又謂之右選文資則進士為優右職則軍

功為優自舉人勞効應襲恩例之外入仕之途尚多若
牌印護衛令史之出職則皇統時所定也檢法知法國
史院書寫則海寧所置也若宗室將軍宮中諸局承應
人宰相書表太子護衛妃護衛王府祇候郎君內侍及
宰相之子并譯史通事省祇候郎君親軍驍騎諸格則
定于世宗之時及章宗所置之太常檢討內侍寄祿官
皆仕進之門戶也凡外任循資官謂之常調朝官謂之
隨朝吏部選者謂之部選分按四季擬授尚書省選者

謂之省選專理資考升遷凡銓注取仕官解由撮行績
資歷之要為銓頭以定其能否其有犯公私罪贓汚者
謂之犯選格雖遇恩不得除叙太宗天會四年始置三
省法古立官海陵初河南北選人並赴中京吏部各置
局銓法世宗大定初除授從八品以下令勿奏聞又隨
季選人如無過或有功酬者依格銓注有廉能及汚濫
者約量升降呈省十年令民願留守令以下官者直赴
部告呈省遣使覆實可超升之明昌三年令隨季部人

依舊制識字者試書判不識字者問以疑難二事優者

量除示勸

除朝及外路六品以上官則隨長任外路止七品官升六品縣令一等除授任滿合降者

免降從七品以下于各等資歷內減兩任擬注若見任縣令升中上者并掌錢數及丁憂去者候解由到部諸局分人亦候將來出職日準上擬注明安穆昆隨門戶減一資

泰和初以縣令丞簿員

闕不相副令散官犯選格及虧永者廣威注令明威注承簿宣宗南遷時詔吏部以秋冬于南京春夏于中都置選而赴調者憚于北行遂併于南京設之至省選資考之制監察御史尚書省具才能者疏名以聽制授任

滿御史臺視其所察公事具書于解由以送尚書省稱職者升擢庸常者臨時取旨不稱者除任其常調正七品兩任升六品六品三任升從五品從五品兩任升正五品正五品三任升刺史內外官俱以三十月為考隨朝官以三十月為任升職一等自非制授尚書選在外官命左司移文勾取大定中內外三品官以五十月為任泰和元年命內外官通算合得升等而少十五月者依舊在職補足而後升除或有餘月日以後積算三年

凡文資右職官應遷三品職事者五品以上歷五十月
六品以下及門廕雜流職事至四品以上而散官應至
三品者皆歷六十月方許告遷後又令內外四品官以
四十月理考通八十月遷三品復以門廕官職事至四
品者絕少令刺史有散官應至三品者即許告遷三品
又令資考各減一任臨時量人材辛苦資歷年甲以次
奏稟先是上嘗以選舉十事命尚書省定擬一減資考
使可用者
不致衰老二隨朝考滿人果才能免回降三隨路提刑
所訪廉能官就令隨宜遷注四許宰相與求仕官相見

以訪才能五薦賢毋避親故如數各舉所知不舉者罪之六舉自代七內外五品以上官長于僚屬內舉才能官一人數外舉者聽八監臨諸物料內及草澤隱逸之士皆聽薦舉九親軍出職內有尤長武藝勇敢過人者今內外官舉提刑司察之十又嘗以太拘資歷不足以定前項各數隨色歲舉一人又嘗以太拘資歷不足以得人至宣宗時以兵興故恩命數出賤職下僚或階極品乃從言者請非親王子及職一品餘人雖散官至一品皆不許封公其已封者儀衛降從二品之制初女直進士上甲除上簿中甲下甲除中簿下簿大定二十五年上甲甲首遷四重餘各遷兩重第二三甲授隨路教

授三十月為一任第一任注九品三任四任注錄事軍
判五任下令自添試論後皆依漢格經義進士第一擬
縣令第二當除察判以無闕遂擬軍判第二第三甲隨
各人住貫擬軍判丞簿凡進士注職上甲者初上簿軍
判丞簿尉中甲下甲者中下簿軍判丞簿尉大定二年
文資官不除縣尉二十三年上甲初錄事防判二下令
三中令中甲初中簿二上簿三下令下甲初下令二中
簿三下令策試中者

進士授章服後再試
時務策一謂之策試上甲初錄事

防判二中令三上令中甲初上簿二下令三中令下甲
初中簿二錄事防判三中令二十六年上甲初錄事防
判二中令三四五上令中甲初中簿二下令三中令四五
上令策試者初錄事防判二三四五上令其次初上簿
二中令三四五上令又次初中簿二下令三中令四五
上令下甲初下簿二下令三中令四五上令狀元舊授
承德郎後改為承務郎貞祐間至奉直大夫上甲舊授
儒林郎更為承事郎貞祐間仍儒林郎中甲以下舊

授從仕郎更為將仕郎貞祐間授徵事郎其右職遷除
自皇統八年制凡帶一命昭信校尉以上者初除主簿
及諸司副使二主簿及諸司使三下令四中令五上令
或通注鎮軍都指揮使及正將其官不及昭信及無官
者自初至三任通注丞簿四下令五中令六上令及知
城寨若門廕之例自天眷中凡一品至八品皆不限所
廕之人至貞元二年定制一品至七品各限以數削八品用
廕之制大定五年十月制亡宋官當廕子孫者並同亡遼

官例十七年四月詔世襲明安穆昆出身者雖年未六十欲令子孫襲者聽又以明安穆昆皆國家勤勞有功之人世襲官不宜以小罪奪泰和二年更定廕叙法年六十以上退與患疾身故者雖非文武官資擬令係班除存習本業者聽廕一人止一子者不須習即廕凡諸色出身文武官一品廕子孫至曾孫及弟兄姪孫六十因門蔭則五人二品子孫至曾孫及弟兄姪五人四品五品三人因門蔭則二人六品二人七品一人因門蔭

則六品七品皆一人凡進納官正班三品廕四人雜班
三人正班武略子孫兄弟一人雜班明威一人懷遠以
上二人鎮國以上三人司天太醫遷至四品換文武官
者廕一人哀宗時詔有司為死節士立褒忠廟又書其
子孫于御屏以備擢用雖時迫危亡為激勵人心之計
要亦勸忠之典也

元太祖初得中原中書令耶律楚材即請用儒術選
士至九年命斷事官扎哈岱及山西東路課稅所長

官劉中厯諸路考試以論及經義詞賦分為三科作
三日程專治一科能兼者聽但以不失文義為中選
復其賦役令與各處長官同署公事尋復中止世祖
中統二年命宣撫司官舉文學才職可以從政及
茂材異等至元四年翰林學士承旨王鶚等請行貢
舉法命中書左三部與翰林學士議立程式十八年詔
求山林隱逸名士
元初用人多由薦授後雖科舉間行
而以徵授官者未可一二數其辭不
受職屢召不起者
皆見于隱逸傳
二十一年丞相和爾果斯等請以貢

舉進士繼而許衡議罷詩賦重經學定為新制事卒未行至仁宗皇慶二年中書省臣言經學實修已治人之道詞賦乃摘章繪句之學自隋唐以來專尚詞賦故士習浮華臣等擬罷律賦省題詩小義而專立德行明經科以取士乃命中書參酌古今定條制科場每三歲一開舉人從本貫官司于諸色戶內擇年及二十五以上經明行修者結罪保舉遣上路府或徇私濫舉并應舉不舉者監察御史肅政廉訪司察治凡考試蒙古色目

人第一場經問五條大學論語孟子中庸內設問用朱氏章句集註第二場策一道以時務出題限五百字以上漢人南人第一場明經經疑二問大學論語孟子中庸內出題並用朱氏章句集註復以己意結之限三百字以上經義一道各治一經詩主朱氏尚書主蔡氏周易主程氏朱氏已上三經兼用古注疏春秋主三傳及胡氏傳禮記用古注疏限五百字以上不拘格律第二場古賦詔誥章表內科一道古賦詔誥用古體章表四六參用古

體第三場策一道經史時務內出題限一千字以上蒙
古色目人願試漢人南人科目中選者加一等注授蒙
古色目人為左榜漢人南人為右榜第一甲第一名賜
進士及第從六品第二及以下及第二甲皆正七品第
三甲皆正八品流官子孫廕叙並依舊制願試中選者
優升一等在官未入流品願試者聽若中選之人已有
九品上資級加一等注授若無品級止依試例從優銓
注其三試各定日期所在官司遲悞者論罪

鄉試八月
二十日第

一場二十三日第二場蒙古色目漢人南人同二十六日第三場止謨人南人會試省部于次年二月初一日試第一場初三日第二場初五日第三場御試三月初七日前期奏委考試官二員監察御史二員讀卷官二員入殿廷考試每舉子一名集賽台一人看守漢人南人試策一道限一千字以上蒙古色目人等試時務策一道限五百字以上
選考試監試等官
行省與宣尉司及腹裏各路有行臺及廉訪司處與臺選官一同商議選差上都大都從省部選差在內監察御史在外廉訪司官一員監試每處差考試官同考試官各一員並於見任并在間有德望文學常選官內選差封彌官謄錄官各一員于廉幹文資正官選充凡謄錄試卷并行移文字皆用朱書省部會試都省選委知貢舉同知貢舉官各一員考試官四員監察御史二員封彌謄錄對讀其試選合格人數視都省大小有差監門等官各一員

鄉試行省十一河南陝西遼陽四川甘肅雲南嶺北征
東江浙江西湖廣又河東山東二宣尉司及直隸省部
之真定東平大都上路凡選合格者三百人赴會
試于內取中選者一百人內蒙古色目漢人南人分卷
考試各二十五人蒙古取七十五人大都十五上都六
河東五真定等五東平等五山東四遼陽五河南五陝
西五甘肅三嶺北三江浙五江西三湖廣三四川一雲
南一征東一色目人取七十五人大都十上都四河東
四東平等四山東五真定等五河南五四川三甘肅二
陝西三嶺北二遼陽二雲南二征東一湖廣七江浙十
江西六漢人取七十五人大都十上都四真定等十一
東平等九山東七河東七河南九四川五雲南二甘肅
二嶺北一陝西五遼陽二征東一南人取七十五
人湖廣十八江浙二十八江西二十二河南七 延祐
二年三月始開科左右榜凡五十六人文宗天厯間至

九十七人順帝元統初增名額及百人至元初從徹爾特穆爾之議詔罷科舉叅政許有壬爭之不得至六年

復之仍稍變程式

減蒙古色目人明經二條增本經義易漢人南人第一場四書疑一道為

本經疑增第二場古賦外于詔誥章表內又科一道

至二十五年兵興多阻其鄉

試者惟燕南河南山東陝西河東數路而已乃倍增鄉

貢之額所放進士復優其品秩焉

第一甲授承直郎第二甲承務郎第三甲

從仕郎

元選法從七品以下屬吏部正七品以上屬中書

三品以上非有司所興奪由中書取進止自六品至九

品為教授中書牒署之自一品至五品為宣授以制命之三品以下用金寶二品以上用玉寶有特旨者有告詞凡諸王分地與所受湯沐邑得自舉其人以聞

各投下總

管府長官不遷外其所屬州縣長官于本投下分到城邑遷轉

凡路府州縣除達嚕噶

齊外長官並選用漢人佐貳官以色目漢人並用文武

散官降職事官二等蒙古色目初授散官或降職事雖

不降必俟官資合轉然後升職漢人初授官不及職再

授則降職授官又軍官或准實授或普減資升等或內

欽定四庫全書

欽定續通典
卷十八

五

升等或外減資或外減內不減皆謂之恩數臺官于省

部選人則興省官議省官于臺憲選人則興臺官議凡
選人解由到部即行照勘合得七品者呈省從七以下
本部注擬其餘流外人員不拘多寡並以一月銓注一
次凡遷叙隨朝以三十月為滿在外以三周歲為滿錢
穀官以得代為滿出職職官轉補與職官同成宗元貞
元年命中書振理選法先是至元十九年御史中丞崔
或言選用臺察官若由中書必有偏徇之弊宜聽本臺

選擇至是省臣言樞密院御史臺例應奏舉官屬其餘諸司不宜奏請今皆請之非便因詔自後諸司無得奏舉官屬專令中書奏擬至大德七年又詔諸司舉用人員並經中書省毋得擅奏又以翰林院國子學官員文翰師儒難同常調須求資格相應之人不得預保十一年武帝即位八月中書省臣言內降旨與官者八百八十餘人已除三百未議者猶五百請自今越奏者勿與又御史臺臣言中書省樞密院御史臺宣政院得自選

官具有戎憲今監祭御史廉訪司官非本臺公選而從

諸臣所請自內降旨非祖宗成法帝俱納之九月中書省臣言內外選法向者遵世祖成制兩宮近侍銓叙惟上所命比有應入常調者夤緣驟遷其已仕廢黜及未嘗入仕者亦復自內降旨臣等先經奏禁而內旨所降復有百餘整飭實難自今銓請如前制非由中書議者毋得越奏仁宗皇慶元年省臣言今春以內降旨除官千餘人其欺偽豈能悉知且亂選法乃詔凡內降旨

勿行文宗至順二年監察御史陳思謙言入仕之門太多黜陟之法太簡州郡之任太淹朝省之除太速欲設三策以救四弊一至元三十年以後增設衙門冗濫不急者從實減并其外有選法者并入中書二參酌古制設辟舉之科令三品以下各舉所知得才則賞失實則罰三古者刺史入為三公郎官出宰百里蓋使外職識朝廷治體內官知民間利病今後歷縣尹有能聲善政者授郎官御史歷郡守有奇才異績者任憲使尚書其

餘各驗資品通選在內者不得三考連任京官在外者須兩任乃遷內職績非出類守不敗官者則循以年勞處以常調凡朝缺官員須二十月之上方許遷除帝可其奏命中書議行之至順帝元統元年命臺憲部官各舉才堪守令者一人至正八年詔京官三品以上歲舉守令一人守令到任三月亦舉一人自代十二年詔隨朝一品職事及省臺院部諸正官各舉循良才幹智勇兼全堪充守令者二人知人多者不限員數各處試用

守令可兼管義兵防禦諸軍鄂囉勸農事所在上司不許擅差守令既已優升其佐貳官員比依入廣例量升二等任滿驗守令全治者與真授不治者全削二等依本等叙半治者減一等叙雜職人員具有智勇之士並依上例凡除常選官于殘破郡縣及迫近賊境之處升四等稍近賊境升二等十六年命六部諸監院正官各舉才堪守令者一人中書省斟酌用之或任內害民受賊者舉官量事輕重降職至元四年定廕叙之法凡廕

諸品官止廕一人以嫡長子同母弟及其子孫曾元如
無則次及旁推皆于合叙品級降一等諸九品依例遷
至正三品者止于本等流轉二品以上選自特旨五年
令三品至七品廕叙人員年二十五以上者當僦使一
年並不支俸滿日三品至五品子孫量材叙用六品七
品子准上銓注監當差使其諸路達魯噶齊子弟廕充
散府諸州達魯噶齊其散府諸州子弟充諸縣達魯噶
齊其諸縣子弟充巡檢凡主兵官有功升擢其舊職宜

別援有功者若陣亡許其子弟承襲

元帥招討司子孫襲為萬戶總管子

孫為千戶總把子孫為百戶給元佩金銀符管其元軍陣亡者仍以本等承襲二十四年詔凡

舊臣勲伐有戰功者其子弟當先試以小職果才能則

大用之大德四年定制正一品子廕正五品從一品子


從五品以次而降至從五品子則從九品正六品子流

官于巡檢內用雜職于省劄錢穀官內用從六品子近

上錢穀官正七品子酌中錢穀官從七品子近下錢穀

官諸色目人視漢人優一等達魯噶齊子孫與民官同

傍廕依例降等至大四年令承廕子孫試一經一史通
大義者免俛使不通者發還習學蒙古色目願試者聽
仍量進一階



欽定續通典卷十八

欽定四庫全書

史部

欽定續通典卷十九

詳校官監察御史^臣曹錫寶

洗馬^臣王坦修覆勘

校對官編修^臣吳典

謄錄舉人^臣沈長春

欽定四庫全書

欽定續通典卷十九

選舉三

歷代制下

明
考績附

明代取士規制與元略同而專取宋朱子所定四書及
易書詩春秋禮記命題其文略仿宋經義然代古人語
氣為之體尚排偶謂之八股通謂之制義直隸就京府
各省就布政司試曰鄉試中式者為舉人以之試禮部

曰會試又中式則天子策試於廷曰廷試亦曰殿試分
一二三甲為次一甲止三人曰狀元授修撰榜眼探花
授編修俱賜進士及第二甲三甲若干人賜進士同進
士出身俱得考選庶吉士子午卯酉年鄉試辰戌丑未
年會試鄉試以八月會試以二月皆初九日為第一場
又三日為第二場又三日為第三場廷試以三月朔舉
子則國子生及府州縣學生員之學成者儒士未仕官
未入流者其文行由有司申舉應之太祖初下金陵辟

儒士范祖幹葉儀克婺州名儒士許元胡翰等日講經史治道克處州徵耆儒宋濂劉基章溢葉琛至建康創禮賢館處之甲辰三月勅中書省有能上書陳言敷宣治道武略出衆者參軍及都督府具以聞或不能文章許詣闕面陳其事於是州縣歲舉賢才及武勇謀略通曉天文之士間及兼通書律者洪武元年遣文元吉詹同等分行天下訪求賢才三年詔曰漢唐及宋取士各有定制然貴文學而不求德藝前元待士甚優而權要

每納奔競之人黃緣阿附輒竊仕祿其懷材抱道者恥與並進自今年八月始特設科舉務取經明行修博通古今名實相稱者朕將親策於廷第其高下而官之使中外文臣皆由科舉而進非科舉者毋得與官於是舉鄉試初場試經義二道限五百字以上四書義一道二場論一道俱限三百字以上三場策一道限一千字以上中式後十日復以騎射書算律五事試之各省貢額有差

直隸百人河南山東山西陝西北平福建江西浙江湖廣皆四十人廣西廣東皆二十五人其才多

或不及者不拘額數高麗安南占城
國士子許於本國鄉試貢赴京師明年會試中式百

二十人帝親策試於奉天殿時以天下初定令各行省
連試三年且官多缺員舉人俱免會試得赴選至四年
乃定三年一舉六年旋令罷去而設聰明正直賢良方
正孝弟力田儒士孝廉秀才人才耆民諸科目以德行
為本文藝次之有司察遣京師不次擢用至十五年復
設科舉十七年禮部以定式頒行初場試四書義三道
每道二百字以上經義四道每道三百字以上未能者

許各減一道四書主朱子集注易主程傳朱子本義書

主蔡氏傳及古注疏詩主朱子集傳春秋主左氏公羊

穀梁及胡安國張洽傳禮記主古注疏

永樂間頒四書五經大全廢注

疏春秋亦不用張洽傳禮記專用陳澔集說

二場試論一道三百字以上判

五道詔誥表内科一道三場試經史時務策五道俱三

百字以上未能者許減二道凡舉子卷首備書姓名年

甲籍貫三代本經前期在內赴應天府在外赴各布政

司置簿登記卷縫皆用鈐印卷尾署印卷官姓名及長

條印記試之蚤入場每人以軍一人守之禁講問代冒
至昏納卷未畢者給燭三條燭盡不成者扶出其納卷
赴受卷所類送彌封所以字號編記送謄錄所謄錄畢
送對讀所凡所官皆謂之外簾官對讀畢送內簾主者
同考官校閱監試官不得干預凡舉子用墨筆謂之墨
卷謄錄用硃謂之硃卷至主考復用墨筆鄉會試同先
是吳伯宗嘗以廷試第一授禮部員外郎至十八年擢
一甲丁顯等為修撰二甲馬京等為編修吳文為檢討

而其餘皆觀政於諸司其在翰林承敕監等衙門者曰
庶吉士其在六部都察院通政司大理寺等衙門者仍
稱進士進士有庶吉士及觀政進士之名自此始也時
科舉薦舉並用中外大臣下至倉庫司局諸雜流皆得
舉文學才幹之士其被薦至者令又轉薦又嘗諭禮部
徵經明行修練達時務之士年六十以上者置翰林備
顧問至成祖永樂二年既授一甲三名翰林官復於第
二甲擇文學優等者五十人及善書湯流等十人俱為

翰林院庶吉士而吉士遂專屬翰林翰林無不由科舉者矣尋復命學士解縉等選曾榮以下二十八人就學文淵閣庶吉士周忱自陳年少願學乃增為二十九人司禮監月給筆墨紙光祿寺給朝暮饌禮部月給膏燭鈔人三錠工部擇近第宅居之帝時至館召試五日一休沐必使內臣隨行且給校尉騎從其後開科或不選

所選亦無定額

永樂十三年選六十二人宣德二年止邢恭一人以其在翰林院習四夷譯書

久也孝宗時大學士徐溥言自永樂二年以來選取庶吉士無定制今後請每科選用令新進士錄平日所作

論策詩賦序記等文呈之禮部送翰林考訂擇其詞藻文理可取者按號行取禮部以糊名卷偕閣臣出題考試於東閣試卷與所投之文相稱即收預選每科所選不過二十人每選所留不過三五輩將來成就必有足賴者乃詔內閣同禮吏二部考選以為永例然自嘉靖癸未至萬厯庚辰中間有九科不選萬厯甲戌張居正以子下第故不選崇禎甲戌丁丑亦不選凡與選者謂之館選以翰林官高資深者一人課之謂之教習三年學成優者留翰林為編修檢討次者出為給事御史謂之散館

林者居半纂修亦諸色參用

天順二年李賢奏纂修專選進士由是非進士不入

翰林非翰林不入內閣

三年北直隸於順天府鄉試十三年二月

行在禮部會試天下貢士三月策士於北京於國子監

立題名石

洪武二十一年始立石於應天府太學至是皆在北京

十四年命貴州

士子附雲南鄉試

雲南鄉試始於六年至是貴州亦附馬嘉靖十四年巡按御史王杏奏貴

州去雲南道里艱險士子附試不便乃就本省開科

時會試有副榜仁宗洪熙元

年定鄉試取士額南京國子監及南直隸共八十名北

京國子監及北直隸共五十名江西五十名浙江福建

各四十五名湖廣廣東各四十名河南四川各三十五

名陝西山西山東各三十名廣西二十名雲南交趾各

十名

宣德四年增雲南五名七年定順天八十名正統二年令不拘額五年定順天仍八十名應天百名

浙江福建皆六十名江西六十五名河南廣東皆五十名
湖廣五十五名山東四川皆四十五名陝西山西皆
四十名廣西三十名雲南二十名六年增順天二十名
景泰元年又令不拘額數四年南北直隸各增三十五
名浙江江西福建河南湖廣山東各增三十名廣東四
川陝西山西廣西各增二十五名雲南增十名成化三
年又增雲南十名十年增五名弘治七年增雲貴共五
名嘉靖十四年定雲南四十名貴州二十五名十九年
增湖廣至九十名萬曆十三年增雲南
五名交趾初定十名尋以棄其地止 會試今不過百

名其後增損不一皆臨時取旨初會試取士無定額少
至三十二名多至四百七十二名又不分南北自洪武
丁丑考官劉三吾白信蹈所取宋琮等五十二人皆南

士三月廷試擢陳邛為第一帝怒所取之偏命侍讀張
信等覆閱邛亦與焉帝猶怒不已親自閱卷取任伯安
等六十一人六月復廷試以韓克忠為第一皆北士也
然訖永樂間未嘗分地而取至仁宗始命楊士奇等定
取士之額南人十六北人十四後又令南北各退五卷
為中卷南取五十五卷北取三十五卷中取十卷仍百
人為率景泰初禮部請取士不分南北戶給事中李侃
等謂北人拙於文辭向制分南北卷不可改禮部言鄉

舉里選之法不可行矣取士若不以文考官焉據且北方中土人才所生以古言之大聖如周孔大賢如顏曾思孟皆非南人以今言之如靖遠伯王驥左都御史王翱王文皆永樂間不分南北所取士今豈可預謂北無其人乃從禮部請五年從給事中徐廷章言復分南北中卷南卷應天及蘇松諸府浙江江西福建湖廣廣東北卷順天山東山西河南陝西中卷四川廣西雲南貴州及鳳陽廬州二府滁徐和三州也神宗萬曆十一年

申定鄉試遣官之制初鄉試主考二人兩京用翰林同
考四人用教職而各省則先期於儒官內聘明經公正
者為之景泰二年命在京在外鄉試同考官五經用五
人三年命布按二司同巡按御史推舉見任教官年五
十以下三十以上文學廉謹者聘充考官於是教官主
試遂為成例其後聘取或非其人監臨官又往往侵奪
其職掌世宗嘉靖七年用兵部侍郎張璁言各省皆遣
京官或進士每省二人馳往主試兩京房考亦各加科

部官一員閱兩科旋罷二十五年從給事中萬虞愷言
各省鄉試精聘教官不足則聘外省推官知縣益之四
十三年又命兩京同考用京官進士易書詩各二人春
秋禮記各一人其餘仍參用教官至萬曆四年復議兩
京同考教官衰老者遣回北京取足於觀政進士及候
補甲科南京於附近知縣推官內選取至是詔定科場
事宜禮部復舉張璠之說言彼時因主考與監臨官禮
節小嫌故行之兩科而止今宜仍遣廷臣由是浙江江

西福建湖廣皆用編修檢討他省用部科官而同考亦多用甲科教職僅取一二而已會試主考二人同考八人洪武十八年命臨期具奏於翰林內用主考二人并同考三人餘用教職景泰五年從尚書胡濙請俱用翰林部曹其後主考率以閣臣為正翰詹一人副之熹宗天啟二年命大學士何宗彥朱國祚主會試嗣後主會試皆用二輔臣以為常同考自景泰後亦漸增至武宗正德六年用翰林十一人科部各二人分詩經房五易

書各四春秋禮記各二至是以易卷多減書之一以增

於易十四年書卷復多乃增翰林一人以補書之缺

十四

四年詩易各增一房共為二十房翰林十二人科部各四人至明季不變

舊制宗室無就試

者萬厯二十三年鄭世子載堉請宗室得儒服就試視才器使始詔奉國中尉以下入試輔國以上爵尊不得與繼而禮臣言封爵科目原自兩途彼既願從科目入仕應照士子出身資格銓除從之惟不得除京朝官然制屢定未果行至三十三年誕育元孫頒詔復及後熹

宗天啟二年會試始開宗科朱慎鑒成進士從主考何
宗彥朱國祚請即授中書舍人莊烈帝崇禎四年朱統
飾成進士初選庶吉士至歷科事變弘治十二年大學
士李東陽少詹事程敏政主會試給事中華鼎劾敏政
鬻題與舉人唐寅徐泰乃命東陽獨主給事中林廷玉
復劾之敏政坐謫官寅泰斥遣嘉靖十六年禮臣嚴嵩
摘應天廣東試錄序語激帝怒應天主考及廣東巡按
御史俱逮問二十二年帝手批山東試錄序譏訕御史

葉經及布政使以下皆得罪亦嵩所中也萬曆三十八年會試御史孫居相劾同考官庶子湯賓尹與各房互換闌卷皆以私韓敬故時吏部方考察因賓尹敬察典四十四年會試吳江沈同和第一同和素不能文文出第六名同里趙鳴陽手事發並論戍天啟二年中允錢謙益主浙江試所取錢千秋卷七篇俱用大結有以關節許者謙益亦自檢舉千秋論戍崇禎初謙益以禮部侍郎與推閣臣而尚書溫體仁摘千秋事許攻謙益

謙益由此罷終明世不復起事跡較異者永樂七年己丑會試中九十五人皇太子以帝北征令送太學至九年廷試天順七年試日舉場火死者九十餘人俱贈進士出身改期八月會試次年三月廷試時英宗以大喪未踰歲御西角門策之正德十五年以南巡未及廷試次年世宗即位亦御西角門策之嘉靖八年帝親閱廷試卷批獎一甲羅洪先楊名歐陽德二甲唐順之陳東任瀚六人大學士楊一清等遂選順之等二十人為庶

吉士疏其名上請教習忽降諭云吉士之制不必選留唐順之等一切除授吏禮二部翰林院會議以聞尚書方獻夫遂謂順之等不必留并限翰林官員數而故事幾廢迨十一年壬辰已罷館選至九月復舉焉崇禎七年舉人顏茂猷文兼五經作二十三藝知貢舉林鈺以聞詔送內簾既副榜矣命特賜進士以其名刻於試錄第一名之前武科自洪武二十年立武學並令武臣子弟於各直省應試三歲武舉六歲會試天順八年令文

武官舉通兵法謀勇出衆者各省撫按三司直隸巡按御史考中後兵部同總兵官於帥府試策略教場試弓馬答策二道騎中二矢步中二矢以上為合式中半者次之成化十四年詔武科鄉會悉視文科例至弘治六年定武舉六歲一行先策略後弓馬不中者不許騎射十七年復令三年一舉正德三年兵部議上武舉條格每文舉鄉試之年預行兩京十三省布政司有完韜略精武藝者報所在官司軍衛送都司有司送布政司從

撫按同三司分場考試

無三司者從撫按考試

兩京亦送巡撫考

試中式者以次年四月初九二十五日會試兵部第

一場校騎射人發九矢須中三矢以上二場校步射亦

發九矢須中一矢以上俱於京營將臺前較閱

及期或風雨不

便騎射則移期

於文舉場試三場答策二道論一道凡試卷皆

彌封謄錄書中馬步箭若干送內簾詳配等第其策論

弓馬俱優為上等次弓馬稍次者次弓馬既優論策文

藻不及者俱列中等餘並黜落以俟後舉其榜張兵部

前次日引見畢於中府賜會武宴嘉靖元年定各省應武舉者巡按御史於十月考試兩京武學於兵部選取俱送兵部次年四月會試以翰林二員為考試官給事中曹四員為同考官後又倣文闡南北卷例分邊方腹裏每十名邊六腹四以為常萬厯之季科臣請設將材武科初場試馬步箭及鎗刀劍戟擊刺等法二場試營陣地雷火藥戰車等法三場各就其兵法天文地理所知者言之報可而未行崇禎四年以時方需才命殿

試傳臚悉如文例乃賜王來聘等及第有差武舉殿試自此始也其任官則文歸吏部武歸兵部吏部凡四司文選掌銓選考功掌考察其職尤要選人有三途曰進士曰舉人貢生官生監生儒士曰吏員承差知印書算篆書譯字通事諸雜流初授者曰聽選陞任者曰陞遷其法每年吏部六考六選凡引選六類選六遠方選二聽選考定陞降者雙月大選改授改降丁憂候補者單月急選其揀選三歲一舉行凡陞遷必滿者若員缺應

補不待滿者曰推陞內閣大學士吏部尚書由廷推或奉特旨侍郎以下及祭酒吏部會同三品以上廷推太常卿以下部推通參以下吏部於宏政門會選詹事由內閣各衙門由各掌印在外官惟督撫廷推九卿共之吏部主之布按員缺三品以上官會舉監司則序遷其防邊兵備率由選擇保舉付以勅書其在外府州縣之正佐在內大小九卿之屬員皆常選官選授遷除一切由吏部太祖洪武中仕進多由薦舉者儒鮑恂余詮全

思誠張長年等起家為文華殿大學士儒士王本杜數
趙民望吳源特置為四輔官兼太子賓客賢良郭有道
秀才范敏曾泰稅戶人才鄭沂儒士趙肅為尚書儒士
張子源張宗德為侍郎耆儒劉堦關賢為副都御史明
經張文通阮仲志為僉都御史人才赫從道為大理少
卿孝廉李德為府尹儒士吳顥為祭酒賢良樂世英徐
景昇李延中儒士張璲王廉為布政使孝弟李好誠聶
士舉賢良蔣安素薛正言張端文學宋亮為參政儒士

鄭孔麟王德常黃桐生賢良余應舉馬衛許安范孟宗
何德宗孫仲賢王福王清聰明張大亨金思存為參議
其以漸而躋貴顯者又無算也吏部奏薦舉當除官者
至三千七百餘人少亦至一千九百餘人南人官北
人官南其後祇令避本省學官不避仁宗洪熙元年吏
部尚書蹇義言布按二司及府州縣官以承流宣化撫
字為職必須銓選精嚴薦舉有法方可得人請令在內
文職七品以上在外五品以上及州縣正官各舉所知

賢能廉幹堪任牧民及風憲者一人吏部考驗酌用其所保非才或授職後闕冗卑污連坐舉主乃定制凡遇布按二司知府缺令三品以上京官保舉其後以知府多由資格不稱任宣宗宣德六年復命大臣薦舉英宗正統元年詔京官三品以上舉堪任御史者四品及侍從言官舉堪任知縣者各一人二年大學士楊士奇言宣德七年以前藩臬二司及府州縣正官惟吏部所舉權衡獨擅聞見不廣未盡得人乃勅大臣保舉得人遂

多間有一二非才蓋緣舉主審察不至或徇私不公所致昔唐太宗命在京三品以上舉郡守縣令遂致斗米三錢之效近來有等京官無人舉保造為謗語欲隳良法伏望仍遵先帝勅旨行其所舉之人籍記舉主後有犯職必正舉主之罪詔從之十二年給事中余忤復言方面郡守有缺吏部當奏請上裁尚書王直等以方面郡守由保舉陞用者多稱職未可擅更詔從直等言而仍採忤疏許言官指劾自宣德三年況鍾趙豫等以薦

擢守蘇松諸府賜勅行事十年用郭濟姚文等為知府亦如之其所奏保者郎中員外御史及司務行人寺副皆與不依常調也部曹及御史由堂上官薦引類能其官帝又慮諸臣以連坐故畏不舉嘗語大學士楊漣全才甚難一言之薦亦豈能保其終身欲得賢才當厚教養時吏治稱極盛焉英宗遵行舊典然日久生弊所舉或僚屬門下親舊私比方面官方正謝莊等由保舉得罪而無人保舉之御史知府往往九年不遷景泰三年

詔罷職文官無贓犯而才學可用者聽在京四品以上
在外撫按方面及府州縣正官薦用孝宗弘治六年詔
各撫按及布按二司遇府州縣官才行俱優者無分舉
貢吏員出身一體保舉五品以上果有才德出衆者開
報吏部奏請定奪初太祖嘗御奉天門選官且諭毋拘
資格選人或即授侍郎進士監生與辟薦者互用給事
御史亦初授陞遷各半永宣後漸循資格而臺省尚多
初授至是資格始拘舉貢雖與進士並稱正途而軒輊

迥異故有是詔

嘉靖四十四年詔各撫按於所屬中不論舉貢進士但有賢能一體保舉隆慶

三年掌吏部大學士高拱言國初進士舉人並用乃後進士偏重而舉人甚輕至於今極矣宜破拘攣之見以開功名之路凡自授官以後惟考政績不必問其出身吏部自行體訪苟係賢能即一體陞取各撫按官一體保薦毋有輕重詔嘉納之

然勢已積重不能復返

世宗嘉靖四十四年吏部尚

書嚴訥請令本年朝覲官各舉所屬府佐以下治行卓異者如國初馮堅以典史擢都御史王興宗以直廳擢布政司故事超擢一二以鼓其志從之穆宗隆慶四年令於諸部寺屬及南京科道各省藩臬中有志行共推

者遇京堂缺每歲間擢數人

從大學士陳以勤請也

神宗萬厯二

十二年吏部尚書孫丕揚患中人請託乃行掣籤法

初選

人常用拈闌尚書李戴擬行此法報可至是始行

凡大選急選聽選人自掣一

時誦為至公而銓政自此一變明制給事中御史謂之

科道洪武至天順成化間進士舉貢監生皆得選補其

選擢者推官知縣而外或由學官其後監生及新科進

士皆不得與或庶吉士改授或取內外科目出身三年

考滿者內則兩京五部主事中行評博國子監博士助

教等外則推官知縣自推知入者謂之行取其有特薦則俸雖未滿亦得與焉嘉靖萬厯間嘗令部曹不許改科道復亦間行之京官惟進士得與考選推知行取則舉貢皆與天下守令進士十三舉貢十七推知行取則進士十九舉貢纔十一又率有臺無省多南少北嘉靖間嘗令監生與選旋罷不行其考選之例優者授給事中次者御史又次者以部曹用雖臨時考試而先期有訪單出於九卿臺省諸臣之手往往據以為高下崇禎

二年考選畢吏部以中書二人訪單互異上請帝責以推諉不悟訪單之非也武臣除授內則中左右前後五府留守司外則各都司各衛所及三宣六慰流官八等都督及同知僉事都指揮使同知僉事正副留守世官九等指揮使及同知僉事衛所鎮撫正副千戶百戶試百戶直省都指揮使二十一留守司二衛九十一守禦屯田羣牧千戶所二百十一及苗蠻土司皆聽兵部武選司選凡大選曰色目曰狀貌曰才行曰封贈曰襲蔭

其途有四曰世職曰武舉曰行伍曰納級任子之制明
初文武官自正從一品至正七品子孫許廕一人其廕
由正從五品以至流外之上中下三等以次遞降大槩
與元制同而旁廕降等及補試之法亦略如之武官爵
至六品其職死者襲老疾者替世久而絕以旁支繼之
凡襲職子弟年二十者比試初試不中受職署事食半
俸二年再試中者食全俸仍不中者謫為軍永樂以後
在京三品以上滿考著績方得請廕遇國家有大典禮

如登極奉徽號冊
后建儲併皇子生

屢有加恩亦率皆勲戚及政府大臣

得之而陣亡克敵及卒於王事者或以功廕或以難廕

例皆錄用其子孫終明之世不變也孝宗時廕子未仕

亡歿許其補廕若應得廕子恩而身故許其子孫自陳

其有子而願廕其兄弟子者聽後又漸減其制焉

正德八年

定制補廕只許一人已補而又故者毋得再補萬厯
十一年詔凡廕子未仕而故年遠親盡者毋得補廕隆

慶五年詔凡以廕入監後中科目者仍令補廕又先由

錄廕國子生後以軍功改授錦衣衛千百戶者許以嫡

次子孫補之蓋明時文武二廕文廕如國子生中書舍人尚寶丞光祿丞通政知事大理評事之類大抵文臣三品以上子孫為之武廕則勲戚之家與閫帥及文臣有軍功者其廕如錦衣各衛千百戶指揮僉事同知及都指揮僉事之類或世襲或一世二世皆酌其功之大小請旨裁定無常制若夫貂璫子弟濫膺勲爵是則明之亂政不足述也

考績

唐自肅宗後考課混淆內外悉考中上德宗貞元五年
趙宗儒領考功事入中上者纔五十人六年以刺史縣
令弊在數更令以四考為限七年令縣令四考無替者
俟五考又諸司朝官須據每年功過行能比類格文以
定陞降凡考第不得槩申中上憲宗元和二年中書門
下奏請京常參官五品以上前資見任俱量定考數於
中書置具員簿以序內外庶官應諸州刺史次亦府少
尹次亦令諸陵令五府司馬及東宮官除左右庶子王

府官四品已下並請五考其臺官先定月數令丞侍御史滿十三月殿中侍御史滿十八月監察御史依前二十五月與轉三省官並三考外餘官並四考外其文武官四品以下並三考量改尚書省四品已上餘文武官三品已上不限此例有進改臨時奏聽進止其權知官至兩考與正授未經正授不得用權知官資改轉其緣官闕需人及緣事須移者不在常格敘遷之限諸道及諸使副使行軍司馬判官參謀掌書記支使推官巡官

等有勅充職掌帶檢校五品以上官及臺省官三考與改轉餘官四考十五年正月穆宗即位考功員外郎李渤請考宰相蕭俛殺文昌崔植翰林學士杜元穎等中下李絳張惟素李益等諫幸驪山鄭覃等陳畋游宜考上下會渤墜馬請急馮宿判考功以三品上為清望官歲進名聽內考舊事非有司所得與渤議遂廢宣宗大中五年吏部奏刺史縣令凡尋常賦稅判斷戶口差科及修整廨館開通道路之類不合計課惟開田招戶辦

獄雪冤及新制置之事任其錄由申上又近年刺史自錄課績申省務銜者張皇其事謙退者緘默不言今請並委本道觀察使定考錄申又州府申官人覆得冤獄書殊考者其元推官多不懲殿或當書下考至時又不提舉今請書殊考日並書元推官下考如以為屈任經廉使及臺省陳論其官人殿犯官長斷於書考日與下考如至時不舉本判官當書下考省司校其所犯如與令式相符便申奏候勅並各牒州府又諸州府申奏每

書兩考三考前課績以冀褒升省司檢勘不精便有僥倖今後不得更申前績又諸州府所申考解皆不指言善最或漫稱考秩或廣說門資今後如有此色請令降其考第從前應得考之人並給考牒為據又近年考牒或一人而數處請給或數年後方請今後得殊考及上考人省司於勅下後便據人數給與

後唐明宗初兩班考績皆以恪勤匪懈清慎明著為辭祠部郎中王承弁請明書考課以示勸懲而卒未果行

時内外文武臣寮每歲有司定考將相俱用御筆黜陟
下中書門下商行廢帝清泰二年定令錄參軍一年依
限征科了絕者加階二年與試銜三年與服色攝令三
年內總及限予真本判官一年加階二年改試銜三年
轉官本曹官省限內征了與試銜轉官諸節級三年內
總了賞三十千

晉高祖天福二年勅朝臣中才特除外任秩滿無遺
闕者將來擬官之時在外一任同在朝一任昇進其就

便自求外職及非特任者不在此限出帝時以經費尚
多公私重困令諸州帳籍錢穀徵科一季一奏兩年賦
稅及限聽三周年為滿三年皆得辦事即與遷陟如或
纔到任所課績不前亦即罷替

漢隱帝乾祐二年令諸州府長吏隨戶勸誘桑棗

小戶
十本

至二十本中戶三十四
十大戶五十至一百

受代時批於厯子省司據為考

課又以外州解由虛增農戶稅額無添蓋有拆居耕種
各立戶名或是避稅逃移併未歸業今後解由內將本

處添出戶口與合徵稅賦開坐

周以前皆以三十月為三考至世宗顯德五年勅自後
授官並以三周年為限閏月不在其內尚書考功奏言
當司所書校內外六品以下赴選官員考第今後以一
周年校成一考三考滿後未有替人在任更一年與成
四考次日俱不在計限逐年須具到任月日自前課績第二考
不得疊計其末考須具得替年月日比類升降諸司諸
色流內出身人逐年於六月初一日後投狀所司省司

據狀却牒本司簡勘九月前較奏須畢有公事出外及在職功過俱須牒報考功不得有妨逐年書較

宋太祖置審官院考課中外職事受代京朝官引對磨勘蓋復序進之制其後稍立法文臣五年武臣七年曾犯贓罪則文臣七年武臣十年治平三年九月詔待制以上六歲至諫議大夫止京朝官四歲至前行郎中止少卿監以七十員為額於是始有止法元豐四年中書擬定磨勘轉官諫議大夫待制以上自通直郎至大中

大夫三年大中大夫以上進士八年餘十年承務郎以上至朝請大夫進士八年餘十年崇寧四年改朝請大夫至中散大夫七年中大夫非兩制不得轉大中大夫紹興四年修立承務以上四年即轉奉直朝議中散中奉中大夫者七年

紹興八年添
入中大夫

諸朝議奉直大夫并特

恩人以八十員為額餘如舊法武臣大使臣修武郎至武德大夫五年武功大夫七年轉遙郡刺史以後十年至遙郡防禦使止而止法尤為嚴密矣進納人至從義

郎止吏職非泛補授至訓武郎止樞密院人亦至訓武
郎止三省人至朝請大夫止已出官不得轉中大夫內
侍至武功郎止駙馬都尉至承宣使止而醫官不過和
安大夫太史局不過春官大夫橫行非戰功不得除授
至選人七階以考第資歷無過犯或有勞績者遞遷謂
之循資若磨勘應格自令錄以上及六考者皆改著作
佐郎無出身及十考者改大理寺丞其有功賞者減一
考若未該磨勘循格至支使及八考者有出身人改太

子中允餘改太子中舍其四色判官及九考以上者改秘書丞無出身人止殿中丞十二考以上改太常博士仁宗時以考第改官者猥多遂詔用帥守通判監司保舉以歲改百員為額元豐稍鑄改官之額觀察判官以上改奉議郎無出身人改通直郎掌書記改通直郎支使以下一例改宣德郎初文武常參官各以曹務閒劇為月限考滿即遷太祖謂非循名責實之道會監門衛將軍魏仁滌等以治市征有羨詔並增秩因罷歲月敘

遷之制非有勞者勿進秩建隆三年定州縣官損戶口
一分以上者降考令尉任內無盜者書上考後又令辭
舍倉庫損壞者殿一選完葺而不煩民力者減一選太

宗即位詔諸道漕臣廉訪官吏能否為三等

臨事簡慢
為下職務

粗治為中治
狀尤異為上

端拱三年令戶部侍郎王沔等磨勘京朝

官吏部侍郎張宏等磨勘幕職州縣官樞密院都承旨
趙鎔等磨勘三班唐制以考功郎中專主考課宋初特
重其事嘗命清望官兼任之至是典益重焉明年立審

官院考課院以翰林學士錢若水樞密直學士劉昌言
同知審官院事判流內銓翰林學士蘇易簡虞部員外
郎知制誥王旦同知考課院事真宗景德四年始令京
朝官及三年磨勘後方得遷官仁宗時凡選人遷京官
引對當與者帝必省察當否嘗令選人私罪如銜謝弗
至對揚失儀皆弗聽磨勘慶厯三年自朝官至郎中少
卿須清望官五人保任乃得遷

范仲淹等請之

後言者以適長

奔競乃止至和初承平日久職業因循賈黯判流內銓

稍以風義整救

推官桑澤官益州三年不知文死代還當遷秩牒自陳人莫肯為作文書澤始

發喪以不得家問為解喪除求勘黜謂三年不與其父通即非匿喪猶之不孝澤遂廢歸不齒晉州推官李亢初以噴進有私罪引去匿所得官以白衣應舉及第積十歲當勘乃自首初事黜以罔冒坐罷之

至英

宗治平二年黜復言磨勘選人未引對者至二百五十餘人皆田薦吏歲限定員濫舉充數明年乃詔歲舉京官以三分率之一分復以蔡抗言罷知雜御史觀察使以上歲得舉官法先是自發運使至知州歸考課院專以監司所第為據至考監司則總其甄別部吏副以採

訪才行爲課悉書中等無所高下神宗即位凡職皆課
凡課責實監司所上守臣不占等者展年降資其治狀
優異者增秩賜金帛以璽書獎勵若監司以上則命御
史中丞侍御史考校又詔考課縣令以斷獄平允賦入
不擾均役止盜勸課農桑賑恤饑窮導修水利戶籍增
衍整治簿書爲最而參用德義清謹公平勤恪爲善參
定上中下等能否尤殊絕者別立優劣二等歲上其狀
以昭賞罰其入優劣者賞罰尤峻高宗南遷禮部員外

郎舒清國言諸道郡縣頃罹兵燬請以戶口增否別考

守令知通考縣令監司考知州分上中下三等

每等又分上中

下會考功較優劣孝宗興隆初著對用之令凡恩例減

磨勘者須對一年實歷乾道二年廷臣言國朝盛時以

審官院考京朝官考課院考幕職州縣官皆中書或兩

制臣僚校其能否以施賞罰熙寧中始罷之自此州縣

之吏不復知有殿最雖有批書徒為文具若身為侍從

并批書俱亡矣望遵故事監司郡守朝辭日別給御前

歷子如薦賢才幾人若為治錢穀若為理獄訟興某利除某害每考令當職官吏從實批書代還詔執事考覈其風績有聞者增秩無狀者罰之寧宗時以郡國按刺多徇私情乃倣舊制於御史臺別立考課一司以刺舉多者為中無刺舉為下歲終各以能否之實上聞以昭升黜度宗咸淳三年酌覈舊制凡文武官公勤廉恪又職事修舉為上公勤廉恪有一長為中既無廉聲又多謬政為下御史臺總帥閫監司監司總守倅守倅總州

縣屬官戎司及屯司軍大壘則總之制司無制司則併各郡總管鈐轄並總於帥司或以逐路所部州縣分隸轉運提舉提刑三司守倅月一考州縣屬官監司會所隸守倅制司會戎司軍壘遵照舊制互用文移會其兵甲獄訟金穀之數及各司屬官書擬公事拘權錢物招軍備器之數次月置冊各申御史臺至半年類考三年定為三等中者無所賞罰上者或轉官或減磨勘下者降官展磨勘

遼聖宗統和九年詔諸道察貪酷十二年詔州縣長吏
有才能無過者減一資考太平六年詔南北諸部廉察
州縣及錫林美稜之官不治者罷之又詔大小職官有
貪殘虐民者立罷之終身不錄其不廉直雖處重任即
代之能清勤自勵者在卑位亦聽薦拔興宗時詔東京
留守察官吏廉幹清強者以聞又詔諸職事官以禮受
代及以罪去者置籍

金制凡內外官所歷資考及更代之期去就之故秩滿

備陳於解由吏部據定能否又撮解由之要於銓擬讀

之謂之銓頭又會歷任銓頭書於行止簿

其簿以姓為類書各人所

歷資考功過

其犯公私罪贓汙者謂之犯選格以廉察升者

為廉升東北沿邊州郡升者為邊升其常調制正七品

兩任升六品六品三任升從五品從五品兩任升正五

品正五品三任升刺史凡內外官皆以三十月為考隨

朝官以三十月為任升職一等章宗時定制正七品已

上皆兩任而後陞明昌四年以前制有職官已帶三品

者不許告遷迺定制已帶三品散官實歷五十月從有司照勘格前進官一階格後為始再算宣宗貞祐三年詔河北山東等路及平涼慶陽臨洮府涇邠秦鞏德順諸州經兵四品以下職事官並以二十月為滿興定元年制廊坊丹州四品以下州縣官視環慶例自熙宗天眷三年令溫都思忠廉問諸路得廉吏杜遵晦以下百二十四人各進一階罷貪吏張軫以下二十一人皇統以後常遣朝官廉察官吏章宗泰和元年十月命監察

御史分四路巡行每路女直漢人各一人同往宣宗貞祐二年臣僚請依大定舊制以監察御史及審錄官分詣諸道考覈庶幾使人自勵興定初以縣令或非材監察御史一過不能備知遂令每歲遣御史巡察仍別選官巡訪以行黜陟之政并定監察御史失察法哀宗至大元年設司農司自卿而下迭出巡察吏治凡職官廉能及汙濫不職各第三等黜陟廉能官第一等進官一階升一等其次約量注授汙濫官第一等殿三年降二

等次二年又次一年皆降一等明安穆昆庶能者第一等遷兩官其次遷一官汙濫者第一等決杖百罷去擇其兄弟代之次杖八十又次杖七十皆令復職佛寧決則罷去永不補差凡功酬虧永之制諸提點院務官三十月遷一官周歲為滿取無虧月日用之大定四年定制一任內虧一分以上降五人二分以上降十人三分以上降十五人若有增羨則依此升遷其升降不盡之數於後任充折二十一年以舊例監當官責決並得赴

調而不顧廉恥者不以刑罰為畏迺命虧永及一酬以
上依格追官殿一年外虧永不及酬者亦殿一年二十
九年罷年遷之法更定制比永課增及一酬遷一官兩
酬遷兩官如虧課則削亦如之各兩官止又罷使司小
都監與使副一體論增虧及餘前升降不盡之數後任
充折之制泰和元年制犯選虧永者右職漢人至宣武
將軍從五品女直至廣威將軍正五品方注縣令又女
直至武義從六漢人諸色人至武略從六皆注諸司兩

除一差至明威方注丞簿宣宗貞祐三年制虧永犯選者遷至宣武注諸司至懷遠從四下方注丞簿至安遠從四上注下令初世宗嘗諭宰臣曰今天下州縣闕員朕欲不限資歷何以徧知其能欲遣使廩問又慮擾民而未得其真若辟舉法久則生弊不如選人暗察明廩如其相同始與升黜又諭曰凡在官若不為隨朝職任便不能離常調宜驗入仕名項或廩等第用之若不稱職即與外除又諭隨朝之官自計歷一考則得其職兩

考則得某職第務因循碌碌而已自今外路官公勤者始與內除苟簡者不須滿任即以本品出之至明昌三年上以老病不任職及不堪親民者舊由隨路提刑司察實即改除他路他路覆察若實勿復注親民之職因問考課法可行否尚書右丞劉瑋曰考課之法綜覈名實今提刑司體察廉能賊濫以行賞罰亦其意也若別議設法恐涉太煩又問唐時何如瑋對以四善二十七最泰和中遂酌唐制定為四善十七最頒行之四善曰

德義有聞曰清慎明著曰公平可稱曰勤恪匪懈十七
最曰禮樂興行肅清所部為政教之最曰賦役均平田
野加闢為牧民之最曰決斷不渝予奪當理為判事之
最曰鈐束吏卒姦盜不滋為督領之最曰按簿分明評

擬均當為檢校之最

以上謂縣令丞簿警巡使副錄事司候判官

曰詳讞合

宜咨執當理為幕職之最曰盜賊消弭使人安靜為巡
捕之最曰明於出納物無損失為倉庫之最曰訓導有
方生徒充業為學官之最曰檢察有方行旅無滯為關

津之最曰提防堅固備禦無虞為河防之最曰出納明
敏數無濫失為監督之最曰禁察禁囚慎重無怨為獄
官之最曰物價得實姦濫不行為市司之最謂市令曰戎

罷完肅扞守有方為邊防之最謂正副隊將鎮防官曰議獄得情

處斷公平為法官之最曰差役均平盜賊止息為軍職

之最謂都軍軍轄凡縣令以下三最以上有四善或三善者

為上升一等三最以上有二善者為中減兩資歷三最
以上有一善為下減一資歷節度判官防禦判官軍判

以下一最而四善或三善為上減一資歷一最而二善為中升為榜首一最而一善為下升本等首宣宗興定元年以六事考舉縣令一田野闢二戶口增三賦役平四盜賊息五軍民和六詞訟簡六事俱備為上等升職一等兼四事者中等減二資歷其次為下等減一資歷否則罷降平常者依本格

元初中原略定事多草創東平行臺所統五十餘城州縣官或自將校或起民伍多昧從政甚以掊克聚斂為

能太祖乃命宋子貞為右司郎中仿前代觀察采訪之制立糾察官吏程式黜貪惰獎廉勤至元元年令官吏員數計月日以考殿最凡理算論日月遷轉憑散官內任以三十月為滿外任以三歲為滿錢穀典守以二歲為滿而理考通以三十月為則內任官率一考升一等十五月進一階京官率一考視外任減一資外任官或一考進一階或兩考升一等或三考升二等四品則內外考通理前任少則後任足之或前任多則後任累之

一考及二十七月兩考及五十四月三考及八十一月
以上遇升則借升而補以後任十年以三十月遷轉太
速六十月太遲乃定三歲一遷十九年定職官迴降之
制江淮官已受宣勅資品例陞二等遷去者依舊於江
淮任用考滿者並免迴降不及考者例存一等有出身
未入流品受宣者任迴三品擬同六品四品同七品五
品同正八品受勅者六品同從八品七品八品同九品
九品同提領案牘巡檢無出身及白身人受宣者三品

同七品四品同八品五品同正九品受勅者六品同從九品七品八品同提領案牘巡檢九品擬院務監當官已上有資品人員再於接連福建兩廣溪洞州郡任用擬陞一等兩廣福建別議陞轉是歲又定內外官三年為考滿任滿始許遷敘二十八年更定隨朝以三十月為滿在外以三周歲為滿錢穀官以得代為滿吏員以九十月日出職是歲改提刑按察司為肅政廉訪司每道仍設官八員除二使留司以總制一道餘六人分臨

所部凡民事錢穀官吏奸弊一切委之俟歲終省臺遣官考其政效武宗至大二年令州縣正官以九年為任三年令考功印歷給親民長吏歲終監治官驗其行蹟書而上之廉訪御史臺尚書吏部考校以為升黜先是至元十九年集賢直學士程鉅夫奏國朝建御史臺有考課之目而未得其要乞照前朝體例應諸道府州司縣下至曹掾等各給出身印紙歷子一卷書本人姓名出身於其前俾各處長吏聯銜狀保書其歷任月日功

過於後秩滿有司詳視而差其殿最則賢否一覽而知是秋始頒行之仁宗皇慶元年臺臣言比年廉訪司多不悉心奉職宜令監察御史檢覈名實黜升之制可時御史中丞郝天挺言國初論最在內須三十月在外須三周歲比者省院臺部之臣久者一二歲少者三五月甚有旬日遷易者奔走往來之不暇何暇宣布參理乞今惟大臣可急關選授其餘內外大小官屬必候任滿考績方許選調庶免朝除夕改啟倖長奸之弊從之文

宗天歷二年中書省臣言比年朝官多不久於其職或數月改遷於典制不類且治績無從考驗請如舊制勅除風憲官外其餘朝官不許二十月內選調

明制有考滿考察考滿者論一身所歷之俸有上中下三等曰稱職曰平常曰不稱職三年給田曰初考六年曰再考九年曰通考依職掌事例考覈升降諸部寺所屬初止署職必考滿始實授外官率通考以待覈凡府以十五萬石以上州七萬石以上縣三萬石以上或親

臨王府都布按三司并有軍馬守禦路當驛道邊方衝
要供給處為繁其田糧不及僻靜處為簡繁簡或不相
當則許互調謂之調繁調簡在京諸司俱從繁例太祖
洪武十四年制在京六部五品以下聽本衙門正官察
驗行能勤怠其四品以上及一切近侍官與御史并太
醫院欽天監王府官不在常選者任滿黜陟取自上裁
十六年凡京官考覈俱由其長開具送部覈考其直隸有司首領官及屬官亦
從本司正官考覈任滿從監察御史覈考各布政司首

領官俱從按察司考覈其茶馬鹽馬鹽運鹽課提舉司
軍職首領官俱從布政司考覈仍送按察司覆考其布
政司四品以上按察司鹽運司五品以上任滿黜陟取
自上裁內外入流并雜職官九年任滿給由赴吏部考
覈依例黜陟有殊勲異能超邁等倫者取自上裁又以
事之繁簡與歷官之殿最參覈等第以為升降考察者
通天下內外官計之其目有八曰貪曰酷曰浮躁曰不
及曰老曰病曰罷曰不謹京官自四品以上自陳候上

裁外五品以下分致仕

老病

降調

浮躁不及

閒住

罷不謹

為民

貪酷

有差具冊奏請謂之京察初五品以下官十年一考孝
宗弘治十四年從南京吏部尚書林瀚言六年一察察
以已亥歲大臣既自陳定去留而居官有遺行者給事
御史得糾劾謂之拾遺所攻擊無獲免者
後至嘉靖十七年始禁之
外官凡州縣以月計上之府府上下其考以歲計上之
布政司至三歲撫按通核所屬官事狀造冊報送麗以
八法亦以致仕降調閒住為民為差謂之大計計處者

不復敘用定為永制自洪武五年勅考課有司必書農桑學校之績六年二月令御史臺御史及各道按察司察舉有司官有無過犯奏報黜陟考察之始也十年七月遣御史巡按州縣設巡按之始也十一年三月命吏部課朝覲官殿最朝覲考覈之始也

入覲官吏部第為三等稱職而無過

者為上賜坐而宴有過而稱職者為中宴而不坐有過而不稱職者為下不預宴序立於門宴者出然後退至十八年帝令稱職者升平常者復職不稱職者降貪汙者付法司罪之闕茸者免為民

成祖永樂

二年九月命自今御史巡行察吏毋得撝拾人言賢否

皆其實蹟以聞仁宗即位以御史巡察外官奉命者不能無私諭吏部尚書嚴加戒飭並命考察布按二司官不職者降為縣官憲宗朝吏科給事中王瑞等言三載黜陟朝廷所以勵庶官之典今天下諸司除土官外無慮九千餘處諸司官除陰陽醫僧道外無慮千萬餘員吏部於各官之賢否在布按二司則據撫按揭帖在諸司則參布按等官揭帖上之詢訪雖出公心下之奏報多任私意或假公市恩或乘機償怨毀譽失真賢否失

實其他弊端不一而足乞諭吏部榜示各官凡揭帖所報失實者連坐或有當黜而留者許本處撫按論奏有當黜而妄訴者亦罪之命俱如所言武宗正德十四年以吏部侍郎張綵請不時考察京官時六年京察之令已久然有以初即位而考察有以災異而考察至考察科道則或以輔臣去位而及其黨者惟嘉靖三十五年輔臣李本掌吏部以尚書李默治獄故悉取部寺九卿自尚書至尚寶丞及六科十三道分別去留蓋帝以星變欲除舊

布新而嚴嵩以此伸恩怨也吏部嘗上言舊制在外有司官員九年考滿稱職者給與應得誥勅至正統十四年凡外官曾經撫按官保舉政績果有卓異不拘三六年考滿先與應得誥勅旌異蓋九年封贈所以待常流三六年先得旌異所以優異等國家之制未為不備但舊例薦舉官員必須轉行巡按御史覈實方與奏請文移往返動經歲月以致恩典稽遲人不知勸夫在外官員職在臨民比之京官勤勞數倍顯揚之願人情所同

第近年保舉每病冗濫請今後撫按官薦舉所屬應旌異官員務遵正統間例將本人任內卓異政績明白開奏不許濫及通候各官考滿到部察訪相同即與比照京官事理按月類題免其再行移核穆宗隆慶四年掌吏部事大學士高拱言數十年來考察澄汰之數大較不相上下以是襲為故常其數既足雖有不肖姑置弗論其數不足雖無其人強索以充其稱為不肖者又多苛求隱細苟應故事而大奸大惡或有所不問又考察

半歲前撫按論劾俱不題覆夫為不善者方其未露猶
或有僥倖之心少存顧忌若其既露明知必去則將無
所不至矣而乃留之半歲民何以堪自今撫按官凡有
糾劾疏既具即革任聽處疏下即覆其去者如考察例
不得復用其留者檄到乃覆至考察懲汰必大奸惡一
切隱細勿論斥去不肖從其多寡惟求至當毋襲故常
又言外官才力不及者不徒曰調用而必曰酌量調用
原無定議然部院考察與撫院論劾概以不及則銓補

之日無所適從尚得遷就其間自今方面有司有才不宜於地者當移其地不易其官署曰調簡僻有官不稱其才者雖易其官當仍其品署曰調簡散亦有操守未壞性氣稍偏尚有他長可錄年勞當敘者署曰降級或才力不宜有司文學猶堪造士者署曰改教四者皆麗不及之條者也至於先以調簡再考不及者即從罷斥置罷軟之下詔俱從之明於察典最重其責貪官尤深故每遇恩詔凡冠帶間住致仕為民復冠帶者必曰不

係朝覲考察嘉靖元年下詔迺除此語弘正以來士大夫
廉恥自重以掛察典為終身之玷萬厯時閣臣有所
徇庇間留一二以撓察典至三十九年二月御史徐兆
魁以顧憲成貽葉向高孫丕揚書盛稱鳳陽巡撫李三
才廉直遂劾東林黨人陰持計典時尚書孫丕揚既劾
罷御史金明時主事秦聚奎而侍郎王圖復考罷祭酒
湯賓尹

宣城人

諭德顧天竣

崑山人

其黨力攻圖圖遂引去

黨局既成互相報復至國亡乃已武臣考察軍政自成

化二年定五年一行之制以現任掌印帶俸差操及初襲官一體考核十三年令兩京通考以為常五府大臣及錦衣衛堂上官自陳候旨直省總兵官如之在內五府所屬并直省衛所官悉由巡視官及部官注送在外都司衛所官由撫按造冊繳部副參以下千戶以上由都布按三司察注送府咨部考舉題奏錦衣衛管戎務者倍加嚴考南北鎮撫咨之各衛所及地方守禦并各都司隸巡撫者例同惟管漕運者不與考



欽定續通典卷十九